

摘藻堂四庫全書薈要

史部

欽定四庫全書叢要卷七千六十五

史部

資治通鑑卷七十九

宋司馬光撰

胡三省音註

晉紀一

一起旃蒙作噩盡玄默執徐凡八年司馬氏
河內溫縣人宣王懿得魏政傳景王師至文

王昭始封晉公以溫縣
本晉地故以爲國號

世祖武皇帝上之上

諱炎字安世姓司馬氏宣王
懿之孫文王昭之長子文王

廟號太祖故帝廟號世
祖謚法克定禍亂曰武

泰始元年

是年十二月方受禪改
元此猶是魏咸熙二年

春三月吳主使光祿

大夫紀陟五官中郎將洪璆

璆渠尤翻

與徐紹孫或偕來報

聘

紹或聘吳見上卷上年

紹行至濡須有言紹譽中國之美者

音譽

余

吳主怒追還殺之

夏四月吳改元甘露

時因蔣陵言甘露降

改元

五月魏帝加文王殊禮

謂旌旗車馬樂舞冕服皆如帝者之儀

進王

妃曰后世子曰太子

癸未大赦

秋七月吳主逼殺

景皇后遷景帝四子於吳尋又殺其長者二人

吳主貶景后封

四弟事見上卷上年長知兩翻

八月辛卯文王卒太子嗣爲相國晉

王九月乙未大赦

戊子以魏司徒何曾爲晉丞相

癸亥以票騎將軍司馬望爲司徒

票匹妙翻
騎奇寄翻

乙亥葬

文王于崇陽陵

考異曰晉書文紀作癸
酉今從魏志陳留王紀

冬吳西陵

督步闡

西陵即夷陵吳主權黃武元年
改夷陵曰西陵宜都郡治焉

表請吳主徙都

武昌吳主從之使御史大夫丁固右將軍諸葛靚守建

業

靚疾
正翻

闡隲之子也

吳主權時隲爲西
陵督隲之日翻

十二月壬戌

魏帝禪位于晉

魏元帝時年二十困敦上章魏文帝
始受漢禪傳五世歷四十六年而亡

甲

子出舍于金墉城

金墉城在洛
陽城西北角

太傅司馬孚拜辭執帝

手流涕歔歔不自勝

歔音虛歔音希又
許既翻勝音升

曰臣死之日固

大魏之純臣也丙寅王即皇帝位大赦改元

至是方改元泰始

丁卯奉魏帝爲陳留王即宮于鄴

即就也

優崇之禮皆倣

魏初故事

見六十九卷魏文帝黃初元年

魏氏諸王皆降爲侯追尊宣

王爲宣皇帝景王爲景皇帝文王爲文皇帝尊王太后

曰皇太后封皇叔祖孚爲安平王叔父幹爲平原王亮

爲扶風王佑爲東莞王駿爲汝陰王彤爲梁王倫爲琅

邪王弟攸爲齊王鑒爲樂安王機爲燕王又封羣從司

徒望等十七人皆爲王

望字之子也帝封諸王以郡爲國邑二萬戶爲大國置上中下

三軍兵五千人萬戶爲次國置上軍下軍兵三千人五千戶爲小國置一軍兵五百人王不之國官於京師音曹從才用翻莞音官以石苞爲大司馬鄭冲爲太傅彤余中翻燕於賢翻

王祥爲太保何曾爲太尉賈充爲車騎將軍王沈爲驃

騎將軍

騎奇寄翻沈持林翻驃匹妙翻

其餘文武增位進爵有差乙亥

以安平王孚爲太宰都督中外諸軍事

晉志曰太宰太傅太保周之三

公官也晉初以景帝諱故又採周官官名置太宰以代太師之任秩增三師與太傅太保皆爲上公大司馬古官也漢制以冠大將軍驃騎將軍之上以代太尉之職故恒與太尉迭置不並列及魏有太尉而大司馬大將軍各自爲官位在三司上晉因其制以太宰太傅太保司徒司空爲文官公左右光祿大夫光祿大夫開府者

位從公冠進賢三梁黑介幘大司馬大將軍太尉爲武
官公驃騎車騎衛將軍伏波撫軍都護鎮軍中軍四征
四鎮龍驤典軍上軍輔國等大將軍
開府者位從公皆著武冠平上黑幘未幾幾居又以車

騎將軍陳騫爲大將軍與司徒義陽王望司空荀顗凡

八公同時並置帝懲魏氏孤立之敝故大封宗室授以

職任又詔諸王皆得自選國中長吏長知衛將軍齊王

攸獨不敢皆令上請上時詔除魏宗室禁錮罷部曲

將及長吏納質任魏防禁宗室甚峻又錮不得仕進今

皆留質任於京師今亦帝承魏氏刻薄奢侈之後矯

罷之將即亮翻質音致

以仁儉太常丞許奇允之子也

晉太常光祿勳衛尉太僕廷尉大鴻臚宗正大

司農少府將作大匠太后三卿大長秋皆爲列卿各置丞功曹主簿五官等帝將有事於太

廟朝議以奇父受誅

奇父允誅事見七十六卷高貴鄉公正元元年朝直遙翻

不宜

接近左右

近其靳翻

請出爲外官帝乃追述允之宿望稱奇

之才擢爲祠部郎

魏尚書曹有祠部郎晉因之

有司言御牛青絲紉

斷

紉直忍翻索也牛系也禮迎牲君執紉周禮封人祭祀飾其牛牲置其絳注曰絳著牛鼻繩所以牽牛者

今人謂之雄疏曰自漢以前皆謂之絳案禮記少儀牛則執紉紉則絳之別名今亦謂之爲紉陸德明曰絳與

紉同又以忍翻又周禮釋音羊晉翻

詔以青麻代之

初置諫官以散騎

常侍傅玄皇甫陶爲之

秦漢以來有諫大夫鄭昌所謂官以諫爲名者也東漢有諫議

大夫魏不復置晉以散騎常侍拾遺補闕即諫官職也

玄幹之子也

傳幹漢傅

玄

以魏末士風頹敝上疏曰臣聞先王之御天下教化隆

於上清議行於下近者魏武好法術而天下貴刑名

呼好

到魏文慕通達而天下賤守節其後綱維不攝

攝整

放

誕盈朝

謂何晏阮籍輩也朝直遙翻

遂使天下無復清議陛下龍興

受禪弘堯舜之化惟未舉清遠有禮之臣以敦風節未

退虛鄙之士以懲不恪臣是以猶敢有言上嘉納其言

使玄草詔進之然亦不能革也 初漢征西將軍司馬

鈞

鈞事見五十卷漢安帝元初二年

生豫章太守量量生潁川太守雋

雋生京兆尹防防生宣帝

序司馬氏之世爲下立廟張本

二年春正月丁亥即用魏廟祭征西府君以下并景帝

凡七室

沈約志曰晉初祭征西將軍豫章府君潁川府君京兆府君與宣皇帝景皇帝文皇帝爲三昭

三穆是時宣皇未升太祖虛位所以祠六世與景帝爲七廟其禮則據王肅說也

尊景帝夫

人羊氏曰景皇后居弘訓宮 丙午立皇后弘農楊氏

后魏通事郎文宗之女也

魏黃初初中書既置監令又置通事郎

羣臣

奏五帝即天帝也王氣時異故名號有五自今明堂南

郊宜除五帝座從之帝王肅外孫也故郊祀之禮有司

多從肅議

周禮曰祀昊天上帝則服大裘而冕祀五帝亦如之鄭玄以爲昊天上帝者天皇大帝北

辰耀魄寶也五帝者五行精氣之神也曰青帝靈威仰曰赤帝赤熛怒曰黃帝含樞紐曰白帝白招矩曰黑帝汁光紀由是有六天之說六天者指其尊極清虛之體其實是一論其五時生育之功其別有五故爲六天據其在上之體謂之天天爲體稱故說天云天顛也因其生育之功謂之帝帝爲德稱故毛詩傳云審諦如帝王肅駁之以爲五帝非天唯用家語之文謂太皞炎帝黃帝少皞顓頊五帝爲五人帝晉羣臣祖肅之說以爲五帝即天帝王氣時異故殊其號雖五其實一神明堂南郊宜除五帝之座五郊改五精之號同稱昊天上帝從

之王于
況翻

二月除漢宗室禁錮

魏既代漢禁錮諸劉今除之

三月

吳遣大鴻臚張儼五官中郎將丁忠來弔祭

以文王之喪也臚陵

如翻吳散騎常侍王蕃體氣高亮不能承顏順指吳主

不悅散騎常侍萬彧中書丞陳聲從而譖之

散悉亶翻騎奇寄翻

丁忠使還

使疏吏翻還從宣翻又如字

吳主大會羣臣蕃沈醉頓伏

沈持林翻吳主疑其詐舉蕃出外

舉羊翻頃之召還蕃好

治威儀

好呼到翻

行止自若吳主大怒呵左右於殿下

斬之出登來山

水經注武昌城南有來山即樊山也吳孫皓登之使親近擲王蕃首而虎爭之

使親近擲蕃首作虎跳狼爭咋齧之

跳它弔翻咋側革翻啖也齧魚結翻

噬也首皆碎壞丁忠說吳主曰北方無守戰之備弋陽可

襲而取

弋陽縣漢屬汝南郡魏文帝分立弋陽郡說輸芮翻

吳主以問羣臣鎮西

大將軍陸凱曰北方新并巴蜀遣使求和非求援於我

也欲蓄力以俟時耳敵執方彊而欲徼幸求勝未見其

利也

徼工堯翻

吳主雖不出兵然遂與晉絕凱遜之族子也

夏五月壬子博陵元公王沈卒

沈持林翻

六月丙午晦

日有食之

文帝之喪臣民皆從權制三日除服既葬

帝亦除之然猶素冠䟽食

食祥吏翻

哀毀如居喪者秋八月

帝將謁崇陽陵羣臣奏言秋暑未平恐帝悲感摧傷帝

曰朕得奉瞻山陵體氣自佳耳又詔曰漢文不使天下

盡哀亦帝王至謙之志

漢文帝遺詔見十五卷後七年真德秀曰文帝此詔乃短喪之

始也然本文蓋爲吏民設耳景帝嗣君也可緣此而短其喪乎

當見山陵何心無服其

議以衰經從行

衰七回翻

羣臣自依舊制尚書令裴秀奏曰

陛下既除而復服義無所依若君服而臣不服亦未之

敢安也詔曰患情不能跂及耳衣服何在

言患哀慕之情不至耳不

在乎衣服也跂去智翻舉踵也

諸君勤勤之至豈苟相違遂止中軍將

軍羊祜謂傳玄曰三年之喪雖貴遂服禮也

三年之喪自天子達

于庶人言雖以天子之貴亦得以遂其孝思爲三年之服

今主上至孝雖奪其服實

行喪禮若因此復先王之法不亦善乎玄曰以日易月

已數百年

以日易月漢儒之謬說也注見十五卷漢文帝後七年

一旦復古難行

也祜曰不能使天下如禮且使主上遂服不猶愈乎玄

曰主上不除而天下除之此爲但有父子無復君臣也

乃止戊辰羣臣奏請易服復膳詔曰每感念幽冥而不

得終苴經之禮

左傳齊晏桓子卒晏嬰麤縗苴經帶杜預注云苴麻之有子者取其麤也苴七

余以爲沈痛

沈持林翻深也

况當食稻衣錦乎

衣於翻

適足激切

其心非所以相解也朕本諸生家傳禮來久何至一旦
便易此情於所天相從已多可試省孔子答宰我之言

論語宰我問三年之喪暮已久矣君子三年不爲禮禮
必壞三年不爲樂樂必崩舊穀既沒新穀既升暮可已
矣孔子曰食夫稻衣夫錦於女安乎曰安孔子曰女安
則爲之宰我出孔子曰予之不仁也子生三年然後免
於父母之懷夫三年之喪天下之通
喪也儀禮曰父者子之天省悉景翻無事紛紜也遂以

疏素終三年

臣光曰三年之喪自天子達于庶人此先王禮經百

世不易者也漢文師心不學變古壞禮

壞音怪

絕父子

之恩虧君臣之義後世帝王不能篤於哀戚之情而

羣臣諂諛莫肯釐正

釐力之翻理也

至于晉武獨以天性矯

而行之可謂不世之賢君而裴傳之徒固陋庸臣習

常玩故而不能將順其美惜哉

孝經曰君子之事上也將順其美匡救其

惡注云將奉也

吳改元寶鼎

以所在得大鼎改元

吳主以陸凱爲左丞相萬歲

爲右丞相吳主惡人視已羣臣侍見莫敢舉目

惡音烏路翻見

音賢

陸凱曰君臣無不相識之道若粹有不虞不知所

赴吳主乃聽凱自視而它人如故

唯凱得視之它人仍舊不得視也

吳

主居武昌揚州之民汴流供給甚苦之

吳武昌屬荊州而丹陽宣城毗

陵吳吳興會稽東陽新都臨海建安豫章臨川鄱陽廬陵皆屬揚州故苦於西上汴流以供給

又奢侈

無度公私窮匱凱上疏曰今四邊無事當務養民豐財

而更窮奢極欲無災而民命盡無爲而國財空臣竊憂

之昔漢室既衰三家鼎立今曹劉失道皆爲晉有此目

前之明驗也臣愚但爲陛下惜國家耳武昌土地危險

堦礪

堦泰昔翻土薄也礪音克角翻山多大石也

非王者之都且童謠云寧

飲建業水不食武昌魚寧還建業死不止武昌居

此苦於汭

流供給而爲是謠也

以此觀之足明人心與天意矣今國無一年

之蓄

禮記王制國無六年之蓄曰急無三年之蓄曰國非其國也況無一年之蓄乎

民有離散

之怨國有露根之漸

以木爲喻也木之所以能生殖者以有根本也根漸露則其本將撥

而官吏務爲苛急莫之或恤大帝時後宮列女及諸織

絡數不滿百景帝以來乃有千數此耗財之甚也又左

右之臣率非其人羣黨相扶害忠隱賢此皆蠹政病民

者也臣願陛下省息百役罷去苛擾料出宮女

去羗呂翻料音

聊

清選百官則天悅民附國家永安矣吳主雖不悅以

其宿望特優容之

考異曰陳壽曰予連從荆揚來者得凱所諫皓二十事博問吳人多云

不聞凱有此表又按其文殊甚切直恐非皓之所能容恐也或以爲凱藏之篋笥未敢宣行病困皓遣董朝省問欲言因以付之虛實難明故不著于篇然愛其指撻皓事足爲後戒故鈔列于凱傳左今不取

九

月詔自今雖詔有所欲及已奏得可而於事不便者皆

不可隱情

既不可希指迎合又不

可以遂事而不諫也戊戌有司奏大晉

受禪於魏宜一用前代正朔服色如虞遵唐故事從之

家語季康子問於孔子曰唐虞二帝其所尚何色孔子曰堯以火德王色尚黃舜以土德王色尚青董仲舒策引孔子曰無爲而治者其舜乎改正朔易服色以順天命而已其餘盡循堯道何更爲哉如二說則舜之承堯固改正朔易服色矣然考之古文尚書堯命羲和歷象日月星辰敬授人時舜正月上日受終于文祖協時月正日而已不言改正朔也易大傳曰黃帝堯舜垂衣裳而天下治書益稷帝曰予欲觀古人之象以五采彰施于五色作服而已不言易服色也漢興六歷有黃帝歷顓頊歷夏歷殷歷周歷魯歷無堯舜歷豈堯舜時用顓頊歷邪孔穎達以爲古之真歷至戰國及秦而亡漢初所存六歷後人託而爲之此固無從考正也

冬

十月丙午朔日有食之

考異曰宋書志無此食今從晉書

永安山賊

施但

吳錄曰永安今武康縣也沈約曰吳分烏程餘杭立永安縣晉武帝太康元年更名武康屬吳興郡

宋白曰永安縣本漢烏程縣之餘不鄉

因民勞怨聚衆數千人劫吳主庶

弟永安侯謙作亂北至建業衆萬餘人未至三十里住

擇吉日入城遣使以謙命名丁固諸葛靚固靚斬其使

發兵逆戰於牛屯

據吳歷牛屯去建業城二十一里靚疾正翻

但兵皆無甲

胄即時敗散謙獨坐車中生獲之固不敢殺以狀白吳

主吳主并其母及弟俊皆殺之初望氣者云荊州有王

氣當破揚州

王于况翻

故吳主徙都武昌及但反自以爲得

計遣數百人鼓譟入建業殺但妻子云天子使荊州兵
來破揚州賊 十一月初并圓丘方丘之祀於南北郊

鄭氏注禮記爲高必因丘陵謂冬至祭天於圓丘之上
爲下必因川澤謂夏至祭地於方澤之中而四郊之祭
又在圓丘方澤之外魏景初元年始營洛陽南委粟山
爲圓丘以冬至祭皇皇帝天於圓丘夏至祭皇皇后地
於方丘而天郊所祭曰皇天之神地郊所祭曰皇地之
祇今以二至之祀合於二郊是後圓丘方澤不別立

罷山陽國督軍除其禁制

魏奉漢獻帝爲山陽公國
於河內山陽縣之濁鹿城

置督軍以防衛之至晉時帝孫康嗣立
人心去漢久矣故罷其衛兵除其禁制

十二月吳王

還都建業

考異曰吳志陸凱傳或曰寶鼎元年十二
月凱與丁奉丁固謀因謁廟欲廢皓立孫

休子時左將軍留平領兵先驅故密語平平拒而不許
誓以不泄是以不果按凱盡忠執義必不爲此事況皓
殘酷猜忌留平庸人若聞凱謀必不能不泄殆虛語耳今不取使后父衛將軍錄尚書

事滕牧留鎮武昌朝士以牧尊戚頗推令諫爭

爭讀曰諍

滕

后之寵由是漸衰更遣牧居蒼梧雖爵位不奪其實遷

也在道以憂死何太后常保佑滕后太史又言中宮不

可易吳主信巫覡

在女曰巫在男曰覡刑狄翻

故得不廢常供養升

平宮

皓尊其母何太后宮曰升平宮供居用翻養羊尚翻

不復進見

見賢遍翻

諸姬佩

皇后璽綬者甚衆滕后受朝賀表疏而已

璽斯氏翻綬音弗朝直遙

翻

吳主使黃門徧行州郡料取將吏家女

行戶孟翻料音聊

其

二千石大臣子女歲歲言名年十五六一簡閱簡閱不

中乃得出嫁

中竹仲翻

後宮以千數而採擇無已

三年春正月丁卯立子衷爲皇太子

爲惠帝亡晉張本

詔以近

世每立太子必有赦

漢高帝爲漢王立太子赦有罪文景武立太子賜民爵至宣帝立太

子始大赦天下元帝立太子復賜民爵光武立太子彊赦天下其後立太子陽及明章立太子皆不赦魏文明

率病篤然後立太子尋而踐阼有赦故革之

今世運將平當示之以好惡

呼

到翻惡使百姓絕多幸之望曲惠小人朕無取焉遂不

烏路翻

赦司隸校尉上黨李熹

熹許記翻又讀曰熹

劾故立進令劉友

前尚書山濤中山王睦尚書僕射武陔各占官稻田

戶劾

槩翻又戶得翻陔柯開翻占之瞻翻

請免濤睦等官陔已亡請貶其謚詔

曰友侵剝百姓以繆惑朝士其考竟以懲邪佞濤等不

貳其過皆勿有所問熹亢志在公當官而行

熹與喜同又音熹亢

與抗同口浪翻

可謂邦之司直矣

詩鄭國風羔裘之辭

光武有云貴戚且

斂手以避二鮑

事見四十二年

其申敕羣僚各慎所司

寬宥之恩不可數遇也

數所角翻

睦宣帝之弟子也

臣光曰政之大本在於刑賞刑賞不明政何以成晉武帝赦山濤而褒李憺其於刑賞兩失之使憺所言爲是則濤不可赦所言爲非則憺不足褒褒之使言言而不用怨結於下威玩於上將安用之且四臣同罪劉友伏誅而濤等不問避貴施賤可謂政乎創業之初而政本不立將以垂統後世不亦難乎

帝以李憺爲太子太傅徵犍爲李密爲太子洗馬

犍居言翻

洗馬自漢以來有之晉職官志太子洗馬職爲謁者秘書掌圖書釋奠講經則掌其事出則直者前驅導威儀

洗漢書作先如淳曰先前驅也國語越王
句踐親爲夫差先馬先一作洗音悉薦翻密以祖母老

固辭許之

密所以辭者以旁無兼侍
祖母與孫相依爲命故也

密與人交每公議

其得失而切責之常言吾獨立於世顧影無儔然而不
懼者以無彼此於人故也 吳大赦以右丞相萬或鎮

巴丘 夏六月吳主作昭明宮

晉太康地記曰昭明宮
方五百丈吳歷曰昭明

宮在太初
宮之東

二千石以下皆自入山督伐木大開苑囿起

土山樓觀窮極伎巧

觀古玩翻
伎渠綺翻

功役之費以億萬計陸

凱諫不聽中書丞華覈上疏曰

華戶化翻覈戶
革翻上時掌翻

漢文之

世九州晏然賈誼獨以爲如抱火厝於積薪之下而寢

其上

事見十四卷漢文帝六年

今大敵據九州之地有大半之衆欲

與國家爲相吞之計非徒漢之淮南濟北而已也

濟子禮翻

比於賈誼之世孰爲緩急今倉庫空匱編戶失業而北

方積穀養民專心東向

自洛進師而造江濱自蜀下兵而臨荆楚皆東向也

又交

趾淪沒嶺表動搖

事見上卷魏元帝咸熙元年

胷背有嫌首尾多難

乃國朝之厄會也若舍此急務盡力功作卒有風塵不

虞之變

難乃旦翻舍讀曰捨卒讀曰碎

當委版築而應烽燧驅怨民而

赴白刃此乃大敵所因以爲資者也時吳俗奢侈覈又

上疏曰今事多而役繁民貧而俗奢百工作無用之器

婦人爲綺靡之飾轉相倣效恥獨無有兵民之家猶復

逐俗

言下至兵民之家亦隨俗好而事奢侈也復扶又翻

內無甌石之儲

應劭曰齊人名

小甕曰甌受二斛晉灼曰石斗石也師古曰甌音都濫翻

而出有綾綺之服上無尊

卑等級之差下有耗財費力之損求其富給庸可得乎

吳主皆不聽

秋七月王祥以睢陵公罷

雖音

九月

甲申詔增吏俸

俸扶用翻

以何曾爲太保義陽王望爲太

尉荀顗爲司徒

顗魚豈翻

禁星氣讖緯之學

星爲星者氣望氣者東漢

以來有讖緯之學

吳主以孟仁守丞相奉法駕東迎其父文

帝神於明陵

明陵在吳興烏程縣沈約曰孫皓改葬其父於烏程西山曰明陵

中使相

繼奉問起居巫覡言見文帝被服顏色如平生

覡刑狄翻被皮

義翻吳主悲喜迎拜於東門之外

建業城東門也

既入廟比七日

三祭設諸倡伎晝夜娛樂

比毗寐翻倡音昌樂音洛

是歲遣鮮卑

拓跋沙漠汗歸其國

沙漠汗入質見七十七卷魏元帝景元二年汗音寒

四年春正月丙戌賈充等上所刊修律令

充等所刊修就漢律九章

增十一篇合二十篇六百二十條其不入律者悉以
爲令施行凡律令合二千九百二十六條上時掌翻帝

親自臨講使尚書郎裴楷執讀

考異曰刑法志云泰始三年事畢表上今從

武紀裴楷傳云文帝時詔楷於御前執讀今從刑法志

楷秀之從弟也

從才

侍中

盧珽

珽它鼎翻

中書侍郎范陽張華請抄新律死罪條目

抄楚

交翻膳寫也

懸之亭傳以示民從之

傳株戀翻

又詔河南尹杜預

爲黜陟之課預奏古者黜陟擬議於心不泥於法

泥乃計翻

末世不能紀遠而專求密微疑心而信耳目疑耳目而

信簡書簡書愈繁官方愈僞

方術也言爲官之方術也

魏氏考課即

京房之遺意

劉劭考課法其畧見七十
三卷魏明帝景初元年

其文可謂至密

然失於苛細以違本體故歷代不能通也豈若申唐堯

之舊制取大捨小去密就簡俾之易從也

易以豉翻
下難易

夫

曲盡物理神而明之存乎其人去人而任法則以文傷

理莫若委任達官各考所統

達官顯官也居一官之
長其事得專達於上

歲

第其人言其優劣如此六載

載子亥
翻年也

主者摠集採案其

言六優者超擢六劣者廢免

六優謂六載俱優
六劣謂六載俱劣

優多劣

少者平敘劣多優少者左遷其間所對不鈞品有難易

主者固當準量輕重微加降殺

量音良殺所戒翻

不足曲以法

盡也其有優劣徇情不叶公論者當委監司隨而彈之

監古銜翻監司御史司隸及諸州刺史也彈唐干翻劾也抨也

若令上下公相容過此

爲清議大類雖有考課之法亦無益也事竟不行丁

亥帝耕籍田於洛水之北戊子大赦二月吳主以

左御史大夫丁固爲司徒右御史大夫孟仁爲司空

吳錄

曰孟仁本名宗避皓字易焉

三月戊子皇太后王氏殂帝居喪之

制一遵古禮夏四月戊戌睢陵元公王祥卒門無雜

弔之賓其族孫戎歎曰太保當正始之世不在能言之

流及間與之言理致清遠豈非以德掩其言乎

正始所謂能言

者何平叔數人也魏轉而爲晉何益於世哉王祥所以可尚者孝於後母與不拜晉王耳君子猶謂其任人柱石而傾人棟梁也理致清遠言乎德乎清談之禍迄乎永嘉流及江左猶未已也

已亥葬文

明皇后有司又奏既虞除衰服

葬日虞遇柔日再虞而三虞用剛日三虞必反

而行之鄭氏曰虞安神之祭也骨肉歸于土竟氣則無所不之孝子爲其彷徨故三祭以安之詔曰受

終身之愛而無數年之報情所不忍也有司固請詔曰

患在不能篤孝勿以毀傷爲憂前代禮典質文不同何

必限以近制使達喪闕然乎

達喪猶通喪也

羣臣請不已乃許

之然猶素冠疏食以終三年如文帝之喪 秋七月衆

星西流如雨而隕 已卯帝謁崇陽陵 九月青徐兗

豫四州大水

青州統齊國濟南樂安城陽東萊徐州統彭城下邳東海琅邪廣陵臨淮兗州統陳

留濮陽濟陰高平任城東平濟北泰山豫州統潁川汝南襄城汝陰梁國沛譙魯弋陽安豐晉志曰青州取土

居少陽其色青爲名徐州取舒緩之義兗端也信也又云取兗水以名州豫者舒也言稟中和之氣性理安舒

也 大司馬石苞久在淮南威惠甚著

魏高貴鄉公甘露三年平諸葛誕苞

代鎮淮南至是凡十一年

淮北監軍王琛惡之

監古銜翻惡烏路翻

密表苞與

吳人交通會吳人將入寇苞築壘遏水以自固帝疑之

羊祜深爲帝言苞必不然

爲于偽翻

帝不信乃下詔以苞不

料賊勢築壘遏水勞擾百姓策免其官

考異曰晉書武紀及苞傳皆

無苞免官年月蕭方等三十國春秋杜延業晉春秋置在此今從之苞傳又云敕琅邪王佃自下邳會壽春按

武紀佃明年二月乃鎮下邳恐傳誤蕭方等梁元帝子也

遣義陽王望帥大軍以徵

之

帥讀曰率

苞辟河內孫鑠爲掾

掾俞綰翻

鑠先與汝陰王駿善

駿時鎮許昌鑠過見之駿知臺已遣軍襲苞私告之曰

無與於禍

與讀曰預

鑠既出馳詣壽春勸苞放兵步出都亭

待罪

壽春都亭也

苞從之帝聞之意解苞詣闕以樂陵公還

第

吳主出東關冬十月使其將施績入江夏萬彊寇

襄陽

夏戶雅翻或於六翻曰晉帝紀作郁今從吳志

考異

詔義陽王望統中軍

步騎二萬屯龍陂

龍陂即摩陂更名見七十卷魏明帝青龍元年

爲二方聲

援會荊州刺史胡烈拒績破之望引兵還

吳交州刺

史劉俊大都督修則

姓譜玄冥之佐有修氏漢有屯騎校尉修炳

將軍顧容

前後三攻交趾交趾太守楊稷皆拒破之鬱林九真皆

附於稷稷遣將軍毛炅董元攻合浦戰于古城

古城蓋合浦郡

古城也吳古邇
翻又古惠翻

大破吳兵殺劉俊修則餘兵散還合浦

稷表吳爲鬱林太守元爲九真太守十一月吳丁奉

諸葛靚出芍陂攻合肥

靚疾正翻
芍音鵲

安東將軍汝陰王駿

拒却之

以義陽王望爲大司馬荀顗爲太尉

顗魚
豈翻

石

苞爲司徒

五年春正月吳主立子瑾爲皇太子二月分雍涼梁

州置秦州

晉志曰雍州以其四山之地故以雍名焉亦
謂西北之位陽所不及陰陽氣雍闕也統京

兆馮翊扶風安定北地新平始平涼州以其地處西方
當寒涼也統金城西平武威張掖西郡燉煌酒泉西海

梁州以西方金剛之氣彊梁也統漢中梓潼廣漢新都涪陵巴西巴東秦州統隴西南安天水略陽武都陰平

郡等以胡烈爲刺史先是鄧艾納鮮卑降者數萬

先悲薦
翻降戶

江翻置於雍涼之間與民雜居朝廷恐其久而爲患以

烈素著名於西方故使鎮撫之

此河西
鮮卑也

青徐兗三州

大水帝有滅吳之志壬寅以尚書左僕射羊祜都督

荊州諸軍事鎮襄陽征東大將軍衛瓘都督青州諸軍

事鎮臨菑鎮東大將軍東莞王伾都督徐州諸軍事鎮

下邳祜綏懷遠近甚得江漢之心與吳人開布大信降

者欲去皆聽之

降戶江翻

減戍邏之卒

邏郎佐翻

以墾田八百餘

頃其始至也軍無百日之糧及其季年乃有十年之積

祜在軍常輕裘緩帶身不被甲

被皮義翻

鈴閣之下侍衛不

過十數人

鈴下卒及閣下威儀也鈴下者有使令則掣鈴以呼之因以爲名閣下威儀掌出入贊導

及納謁受事

濟陰太守巴西文立

濟子禮翻守式又翻

上言故蜀之

名臣子孫流徙中國者宜量才敘用

量音良

以慰巴蜀之

心以傾吳人之望帝從之

考異曰立傳載此表在遷太子中庶子後按泰始七年

立舉郤詵時猶爲濟陰太守於今未爲庶子也若諸葛京署吏不因立表則京先已署吏立不當更云宜量才

敎用也

已未詔曰諸葛亮在蜀盡其心力其子瞻臨難而

死義

事見七十八卷魏元帝景元四年難乃旦翻

其孫京宜隨才署吏又詔

曰蜀將傅僉父子死於其主

傅彤死見六十九卷魏文帝黃初三年傅僉死與諸

葛瞻同年

天下之善一也豈由彼此以爲異哉僉息著募沒

入奚官

息子也著與募二子之名也少府有奚官令凡男女沒入者屬焉魏以來鄴都又有奚官督

宜免爲庶人

帝以文立爲散騎常侍漢故尚書捷爲

程瓊雅有德業

捷居言翻

與立深交帝聞其名以問立對曰

臣至知其人但年垂八十稟性謙退無復當時之望

其言

意望不求聞達於當時也

故不以上聞耳瓊聞之曰廣休可謂不黨

矣

文立字廣休論語曰君子不黨

此吾所以善夫人也 秋九月有星

孛于紫宮

字蒲內翻

冬十月吳大赦改元建衡 封皇子

景度爲城陽王

初汝南何定嘗爲吳大帝給使及吳

主即位自表先帝舊人求還內侍吳主以爲樓下都尉
典知酤糴事遂專爲威福吳主信任之委以衆事左丞
相陸凱面責定曰卿見前後事主不忠傾亂國政寧有
得以壽終者邪何以專爲姦邪塵穢天聽宜自改厲不

然方見卿有不測之禍定大恨之凱竭心公家忠懇內

發表疏皆指事不飾

皆指實事不爲文飾也

及疾病吳主遣中書

令董朝問所欲言凱陳何定不可信用宜授以外任奚

熙小吏建起浦里塘亦不可聽

吳主休之時嚴密嘗建此議熙蓋祖其說

信樓玄賀邵張悌郭連

連敕角翻又勅畧翻

薛瑩滕修及族弟喜

抗或清白忠勤或資才卓茂皆社稷之良輔願陛下重

留神思

思相吏翻

訪以時務使各盡其忠拾遺萬一邵齊之

孫

賀齊爲吳主權將

瑩綜之子玄沛人修南陽人也凱尋卒吳

主素銜其切直

有所恨怒蓄而不發者爲銜

且日聞何定之譖久之

竟徙凱家於建安

吳主遣監軍虞汜

汜音祀

威南將軍

薛珣

珣况羽翻

蒼梧太守丹陽陶璜從荊州道監軍李勗督

軍徐存從建安海道

從荊州道踰嶺而入交廣也從建安海道汎海而南也沈約曰建安

本閩越秦立爲閩中郡漢虛其地後立爲冶縣屬會稽郡後分冶地爲會稽東南二郡都尉東部臨海是也南部建安是也吳主休永安三年分南部立爲建安郡宋白曰孫策於建安十二年分東侯官之地立建安縣即

以年號爲名

皆會於合浦以擊交趾

十二月有司奏東宮

施敬二傳其儀不同

晉制太子太傅中二千石少傅二千石太子先拜諸傅然後答之時

未置詹事官事
大小皆由二傳

帝曰夫崇敬師傅所以尊道重教也何

言臣不臣乎

臣不臣蓋有司所奏之言

其令太子申拜禮

六年春正月吳丁奉入渦口

水經渦水首受河南陽武縣蕩蕩渠東南至下邳淮

陵縣入淮謂之渦口渦音戈

考異曰吳志丁奉傳建衡元年攻晉穀陽晉帝紀不載奉傳不言入渦口疑是

一 事 揚州刺史牽弘擊走之

吳萬彧自巴丘還建業

夏四月吳左大司馬施績卒以鎮軍大將軍陸抗都督

信陵西陵夷道樂鄉公安諸軍事治樂鄉

水經注樂鄉城在南平郡

之孱陵縣江水逕其北江水又東逕公安縣北宋白曰樂鄉者春秋郡國之地其城陸抗所築在松滋縣界晉

地理志信陵縣屬建平郡沈約曰疑是吳立水經注曰江水自夔城而東逕信陵縣南又東過夷陵縣南夷陵即西陵也樂鄉城在今江陵府松滋縣東樂鄉城北江中有砂磧對岍踏淺可渡江津要害之地也抗以

吳主政事多闕上疏曰臣聞德均則衆者勝寡力侔則安者制危此六國所以并於秦西楚所以屈於漢也今敵之所據非特關右之地鴻溝以西而國家外無連衡之援內非西楚之彊庶政陵遲黎民未乂議者所恃徒以長江峻山限帶封域此乃守國之末事非智者之所先也臣每念及此中夜撫枕臨餐忘食夫事君之義犯

而勿欺謹陳時宜十七條以聞

抗傳云十七條失本不載

吳主不納

李勗以建安道不利殺導將馮斐引軍還

將即亮翻

初何定

嘗爲子求婚於勗勗不許乃白勗枉殺馮斐擅徹軍還

誅勗及徐存并其家屬仍焚勗尸定又使諸將各上御

犬

上時掌翻

一犬至直縑數十匹纓紲直錢一萬

紲私列翻係也

以

捕兔供厨吳人皆歸罪於定而吳主以爲忠勤賜爵列

侯陸抗上疏曰小人不明理道所見既淺雖使竭情盡

節猶不足任況其姦心素篤而憎愛移易哉吳主不從

六月戊午胡烈討鮮卑秃髮樹機能於萬斛堆

樹機能祖

壽闐之在孕也其母相掖氏因寢而產於被中鮮卑謂被爲秃髮因而氏焉至南涼秃髮烏孤則樹機能之五世孫也萬斛堆在溫園水東北安定郡高平縣界兵敗被殺都督雍涼州諸軍

事扶風王亮遣將軍劉旂救之旂觀望不進亮坐貶爲平西將軍旂當斬亮上言節度之咎由亮而出乞丐其

死

丐居太翻貸其死命也

詔曰若罪不在旂當有所在乃免亮官

遣尚書樂陵石鑒行安西將軍都督秦州諸軍事

樂陵縣漢

屬平原郡後討樹機能樹機能兵盛鑒使秦州刺史杜

預出兵擊之預以虜乘勝馬肥而官軍縣乏

縣讀曰懸

宜并

力大運芻糧須春進討鑒奏預稽乏軍興檻車徵詣廷

尉以贖論

時預以尚主在八議以俟贖論

既而鑒討樹機能卒不能克

卒
恤翻

秋七月乙巳城陽王景度卒

丁未以汝陰王

駿爲鎮西大將軍都督雍涼等州諸軍事鎮關中

冬

十一月立皇子東爲汝南王

吳主從弟前將軍秀爲

夏口督吳主惡之民間皆言秀當見圖

秀吳主權弟匡之孫從才用翻

惡
烏路翻

會吳主遣何定將兵五千人獵夏口秀驚夜將妻

子親兵數百人來奔十二月拜秀票騎將軍開府儀同

三司封會稽公

厚其封賞以攜吳人
票匹妙翻會工外翻

是歲吳大赦

初魏人居南匈奴五部於并州諸郡與中國民雜居

南匈奴

奴自東漢以來分居并州諸郡魏但分其衆爲五部耳
事見六十七卷漢獻帝建安二十一年時左部所統可
萬餘落居太原故茲氏縣右部可六千餘落居祁縣南
部可三千餘落居蒲子縣北部可四千餘落居新興縣
中部可六千餘落居大陵縣自謂其先漢氏外孫因改姓劉氏

初漢高帝

以女妻單于故自謂
漢氏外孫冒姓劉氏

七年春正月匈奴右賢王劉猛叛出塞

豫州刺史石

鑒坐擊吳軍虛張首級詔曰鑒備大臣吾所取信而乃

下同爲詐義得爾乎

爾猶言如此也

今遣歸田里終身不得復

用

復扶又翻

吳人刁玄詐增讖文曰黃旗紫蓋見於東南

終有天下者荆揚之君

姓譜刁姓齊大夫豎刁之後予按豎刁安得有後漢書貨殖傳

有刁間江表傳曰玄使蜀得司馬徽論運命歷數事因詐增其文以誑吳人見賢通翻

吳主信之

是月晦大舉兵出華里

華里在建業西

載太后皇后及後宮數

千人從牛渚西上

水經注牛渚在姑孰烏江兩縣界中今太平州當塗縣北三十里有牛渚

山山下有牛渚磯與和州橫江渡相對杜佑曰牛渚圻即今當塗縣采石

東觀令華覈等固

諫不聽

東觀令典校圖書及記述觀古玩翻華戶化翻覈戶華翻

行遇大雪道途陷

壞兵士被甲持仗

義被皮翻

百人共引一車寒凍殆死皆曰

若遇敵便當倒戈

紂發兵與周武王會戰于牧野前徒倒戈攻其後以北

吳主聞

之乃還

還從宣翻又如字

帝遣義陽王望統中軍二萬騎三千

屯壽春以備之聞吳師退乃罷三月丙戌鉅鹿元公

裴秀卒夏四月吳交州刺史陶璜襲九真太守董元

殺之楊稷以其將王素代之

考異曰璜傳云出其不意徑至交趾按元乃九真

太守非交趾也華陽國志云元病亡楊稷更以王素代之按武帝紀四月九真太守董元爲吳將虞汜所攻軍

敗死之則元非病亡蓋稷雖以素代元未至郡而元死也

北地胡寇金城涼州刺

史牽弘討之衆胡皆內叛與樹機能共圍弘於青山

續漢

志青山在北地郡參縣縣界賢曰青山在今慶州有青山水

弘軍敗而死

考異曰崔鴻十六

國春秋秃髮烏孤傳云其先樹機能本河西鮮卑泰始中殺秦州刺史胡烈斬涼州刺史牽弘晉帝紀叛虜殺胡烈北地胡殺牽弘皆不言鮮卑蓋言羣虜內叛則鮮卑亦在其中矣或北地胡即樹機能也初大司

馬陳騫言於帝曰胡烈牽弘皆勇而無謀彊於自用非

綏邊之材也將爲國恥時弘爲揚州刺史多不承順騫

命

時騫以大司馬都督揚州諸軍鎮壽春

帝以爲騫與弘不協而毀之于

是徵弘既至尋復以爲涼州刺史騫竊歎息以爲必敗
二人果失羗戎之和兵敗身沒征討連年僅而能定帝
乃悔之 五月立皇子憲爲城陽王 辛丑義陽成王

望卒 侍中尚書令車騎將軍賈充自文帝時寵任用

事帝之爲太子充頗有力

事見七十七卷
七十八卷魏紀

故益有寵於

帝充爲人巧諂與太尉行太子太傅荀顗

晉志曰帝以
儲副體尊命

諸公居二傳職以本位尊
故或行或領顗魚豈翻

侍中中書監荀勗越騎校尉

安平馮紇

安平縣前漢屬涿郡後漢屬安
平國晉屬博陵郡統都感翻

相爲黨友朝

野惡之

惡鳥路翻

帝問侍中裴楷以方今得失對曰陛下受

命四海承風所以未比德於堯舜者但以賈充之徒尚

在朝耳

朝直遙翻

宜引天下賢人與弘政道不宜示人以私

侍中樂安任愷河南尹潁川庾純皆與充不協充欲解

其近職

近職謂侍中任音壬

乃薦愷忠貞宜在東宮帝以愷爲太

子少傅而侍中如故

晉志曰侍中任愷帝所親敬使領少傅蓋一時之制也觀此則充欲

以計

會樹機能寇亂秦雍

雍於用翻

帝以爲憂愷曰宜得威

望重臣有智畧者以鎮撫之帝曰誰可者愷因薦充純

亦稱之秋七月癸酉以充爲都督秦涼二州諸軍事侍

中車騎將軍如故

考異曰三十國春秋晉春秋充出並在八年二月按武帝紀充出在此

月蓋二春秋以太子納妃在八年二月致此誤也

充患之

吳大都督薛珣

珣

羽與陶璜等兵十萬共攻交趾城中糧盡援絕爲吳所

陷虜楊稷毛晃等璜愛晃勇健欲活之晃謀殺璜璜乃

殺之修則之子允生剖其腹割其肝曰復能作賊不

不讀

曰晃猶罵曰恨不殺汝孫皓汝父何死狗也

允父則爲晃所殺見

上四年考異曰漢晉春秋曰初霍弋遣楊稷毛晃等

戍交趾與之誓曰若賊圍城未百日而降者家屬誅若

過百日救兵不至而城沒者吾受其罪稷等守未百日糧盡乞降於璜不許而給糧使守諸將並諫璜曰霍弋已死不能救稷等必矣可須其日滿然後受降使彼得無罪而我取有義內訓吾民外懷鄰國不亦可乎稷等期訖糧盡救兵不至乃納之華陽國志則云稷等城破被囚稷歐血死炁罵賊死二者相戾不可得合而晉陶璜傳兼載之按孫皓猜暴恐璜不敢以糧資敵今從華陽國志

王素欲逃歸南中吳人

獲之九真日南皆降於吳

降戶江翻

吳大赦以陶璜爲交州

牧璜討降夷獠

獠魯皓翻

州境皆平

八月丙申城陽王憲

卒分益州南中四郡置寧州

寧州以建寧郡名州統建寧興古雲南永昌四

郡

九月吳司空孟仁卒

冬十月丁丑朔日有食之

考異曰宋書五行志有五月庚寅食無十月丁丑食
晉書紀及天文志有十月丁丑食無五月庚寅食今從

晉書 十一月劉猛寇并州并州刺史劉欽擊破之 晉志并州

不以衛水爲號又不以恒爲稱而云并者以其在兩谷
之間也統太原上黨西河樂平雁門新興按晉志所云
以周禮并州鎮曰恒山春秋元命包曰營室流爲并州分爲衛國也 賈充將之鎮公卿

餞於夕陽亭 賢曰夕陽亭在河南城西 充私問計於荀勗勗曰公爲

宰相乃爲一夫所制不亦鄙乎然是行也辭之實難獨
有結婚太子可不辭而自留矣充曰然則孰可寄懷勗
曰勗請言之因謂馮統曰賈公遠出吾等失執太子婚

尚未定何不勸帝納賈公之女乎統亦然之初帝將納

衛瓘女爲太子妃充妻郭槐賂楊后左右使后說帝求

納其女帝曰衛公女有五可賈公女有五不可衛氏種

賢而多子美而長白

五可種賢一也多子二也美三也長四也白五也五不可以類推

說輸芮翻種章勇翻下同

賈氏種妬而少子醜而短黑后固以爲請

荀顗荀勗馮統皆稱充女絕美且有才德帝遂從之留

充復居舊任

爲賈氏亂晉張本

十二月以光祿大夫鄭袤爲

司空袤固辭不受

袤音茂

是歲安樂思公劉禪卒

樂音洛

考異曰晉春秋云禪謚惠公今從王隱蜀記

吳以武昌都督廣陵范慎爲

太尉右將軍司馬丁奉卒

據丁奉傳以救壽春之功拜左將軍誅孫綝拜大將軍加

左右都護共迎吳主皓還右大司馬左軍師當書右大司馬左軍師

吳改明年元曰鳳

皇

以西苑言鳳皇集改元

八年春正月監軍何楨討劉猛屢破之潛以利誘其左

部帥李恪

左部五部之一也帥所類翻

恪殺猛以降

降戶江翻

二月辛

卯皇太子納賈妃妃年十五長於太子二歲

長知兩翻

妬忌

多權詐太子嬖而畏之

嬖卑義翻又博計翻

壬辰安平獻王孚

卒年九十三字性忠慎宣帝執政字常自退損後逢廢

立之際未嘗預謀景文二帝以字屬尊亦不敢逼

字於廢立

之際柔而能正事見七十六卷
正元元年七十七卷景元元年

及帝即位恩禮尤重元

會詔字乘輿上殿帝於阼階迎拜

阼階東階主階也
上時掌翻下同

既

坐親奉觴上壽如家人禮帝每拜字跪而止之字雖見

尊寵不以爲榮常有憂色臨終遺令曰有魏貞士河內

司馬孚字叔達不伊不周不夷不惠立身行道終始若

一當衣以時服斂以素棺

衣於旣翻斂力瞻翻

詔賜東園溫明秘

器

服虔曰東園溫明形如方漆桶開一面漆畫之以鏡置其中以懸尸上大斂并蓋之師古曰東園署名也

屬少府其署主作此器秘器梓棺以凶器故秘之

諸所施行皆依漢東平獻王

故事

見四十八卷漢章帝建初八年

其家遵孚遺旨所給器物一不施

用帝與右將軍皇甫陶論事

泰始五年罷鎮軍將軍復置左右將軍姓譜左

傳宋有皇父充石公族也漢初有皇父鸞自魯徙居茂陵改父爲甫

陶與帝爭言散騎常

侍鄭徽表請罪之帝曰忠謹之言

謹多叢翻善言也

唯患不聞

徽越職妄奏豈朕之意遂免徽官

夏汶山白馬胡侵

掠諸種

漢武帝誅冉駹開汶山郡宣帝地節三年合於蜀郡蜀漢劉氏又立汶山郡白馬胡即白馬夷

也汶讀與岷
同種章勇翻

益州刺史皇甫晏欲討之

益州統蜀犍爲汶山漢嘉江陽

朱提越嶲犛柯晉志曰益之爲言阨言所
在之地險阨也亦曰疆壤益大故以名焉

典學從事蜀

郡何旅等

典學從事典學校及部諸郡文學掾漢諸州刺史有孝經師主監試經月令師主時節祭

祀魏晉合其職爲典學從事

諫曰胡夷相殘固其常性未爲大患今

盛夏出軍水潦將降必有疾疫宜須秋冬圖之晏不聽

胡康木子燒香言軍出必敗

康木子燒香胡人之名

晏以爲沮衆

斬之軍至觀阪

水經注觀阪在都安縣晉書地理志都安縣屬汶山郡沈約曰都安縣蜀立宋

白曰永康軍導江縣蜀都安縣地沮在呂翻

牙門張弘等以汶山道險且畏

胡衆因夜作亂殺晏軍中驚擾兵曹從事犍爲楊倉勒

兵力戰而死

自漢以來諸州有軍事則置兵曹從事犍居言翻

弘遂誣晏云率

已共反故殺之傳首京師晏主簿蜀郡何攀

州主簿錄閣下事省

文書郡主簿所職略同

方居母喪聞之詣洛證晏不反弘等縱兵

抄掠

抄楚交翻

廣漢主簿李毅言於太守弘農王濬曰皇甫

侯起自諸生何求而反且廣漢與成都密邇而統於梁

州者朝廷欲以制益州之衿領

漢廣漢郡治雒陽始二年分新都郡治雒而廣

漢郡治廣漢縣與成都相近衿衣系領衣要衿著項領處也

正防今日之變也今益

州有亂乃此郡之憂也張弘小豎衆所不與宜即時赴

討不可失也濬欲先上請

上時掌翻下先上同

毅曰殺主之賊爲

惡尤大當不拘常制何請之有濬乃發兵討弘詔以濬

爲益州刺史濬擊弘斬之夷三族

弘考異曰華陽國志殺晏在十年五月

武帝紀在今年六月按王濬請伐吳表云臣作船七年日有朽敗濬再爲益州刺史方受詔作船咸寧五年下詔伐吳借使濬以其年上表則再爲益州亦在泰始九年之前矣今從晉紀爲定封濬關內侯

初濬爲羊祜參軍

晉制諸位從公爲持節都督參軍六人

祜深知之祜兄

子暨白濬爲人志大奢侈不可專任宜有以裁之祜曰

濬有大才將以濟其所欲必可用也更轉爲車騎從事

中郎

祜爲車騎將軍其屬有從事中郎秩比千石

濬在益州明立威信蠻夷

多歸附之俄遷大司農時帝與羊祜陰謀伐吳祜以爲

伐吳宜藉上流之勢密表留濬復爲益州刺史使治水

軍

治直之翻

尋加龍驤將軍監益梁諸軍事

龍驤將軍之號始此驤思將翻

監工銜翻晉制方面之任資重者爲都督諸軍事資望輕者爲監軍事 考異曰羊祜傳曰表留濬監益州諸

軍事加龍驤將軍按濬傳祜密表留濬重拜益州刺史

又曰尋以謠言拜龍驤將軍監益梁諸軍事然則作刺史與監軍自是二事也華陽國志又云咸寧四年濬遷大司農五年拜龍驤監益梁二州按是時羊祜已卒尤

不可據

詔濬罷屯田軍大作舟艦

艦戶

別駕何攀以爲屯

田兵不過五六百人作船不能猝辦後者未成前者已

腐宜召諸郡兵合萬餘人造之歲終可成濬欲先上須

報

上時掌翻

攀曰朝廷猝聞召萬兵必不聽不如輒召

輒專也

設當見却功夫已成執不得止濬從之令攀典造舟艦

器仗於是作大艦長百二十步

長直亮翻

受二千餘人以木

爲城起樓櫓開四出門其上皆得馳馬往來

考異曰華陽國志

云咸寧二年三月濬受詔作船按濬表云作船七年則國志不可據也

時作船木柿蔽江

而下

梯芳廢翻說文曰削木札
樸也字本作梯詳見辨誤

吳建平太守吳郡吾彥

建平郡漢南郡之巫縣吳主權分置宜都郡吳主休永
安三年分宜都立建平郡領信陵興山秭歸沙渠四縣

杜佑曰建平今已東郡吳置建平郡於
秭歸姓譜吾本已姓夏昆吾氏之後

取流梯以白吳

主曰晉必有攻吳之計宜增建平兵以塞其衝要

塞悉則翻

吳主不從彥乃爲鐵鎖橫斷江路

斷丁管翻爲後王
濬燒斷鐵鎖張本

王

濬雖受中制募兵而無虎符廣漢太守敦煌張敷收濬

從事列上

敦徒門翻敷胡
敷翻上時掌翻

帝召敷還責曰何不密啓而

便收從事敷曰蜀漢絕遠劉備嘗用之矣輒收臣猶以

爲輕帝善之 壬辰大赦 秋七月以賈充爲司空侍

中尚書令領兵如故

充自文帝時
統城外諸軍

充與侍中任愷皆爲

帝所寵任充欲專名勢而忌愷於是朝士各有所附

直朝

遙朋黨紛然帝知之召充愷宴于式乾殿而謂之曰朝

廷宜壹大臣當和充愷等各拜謝既而充愷以帝已知

而不責愈無所憚外相崇重內怨益深充乃薦愷爲吏

部尚書愷侍覲轉希

既不爲侍中
則侍覲希矣

充因與荀勗馮統承

間共譖之

間古
覓翻

愷由是得罪廢於家

八月吳主徵昭

武將軍西陵督步闡闡世在西陵

自吳主權用步騭督西陵騭卒子協繼之

闡協弟也

粹被徵自以失職且懼有讒九月據城來降遣兄

子璣璿詣洛陽爲任

璣璿皆協子降戶江翻璿如緣翻

詔以闡爲都督

西陵諸軍事衛將軍開府儀同三司侍中領交州牧封

宜都公 冬十月辛未朔日有食之 敦煌太守尹璩

卒

敦徒門翻璩求於翻

涼州刺史楊欣表敦煌令梁澄領太守功

曹宋質輒廢澄表議郎令狐豐爲太守

考異曰晉春秋璩作璩今從

武紀武紀云令狐豐廢澄自領郡事今從晉春秋

楊欣遣兵擊之爲質所敗

補敗

邁翻

吳陸抗聞步闡叛亟遣將軍左奕吾彥等討之帝

遣荊州刺史楊肇迎闡於西陵車騎將軍羊祜帥步軍

出江陵巴東監軍徐允帥水軍擊建平以救闡

帥讀曰率

陸

抗敕西陵諸軍築嚴圍自赤谿至于故市

水經注江水出西陵峽東

南流逕故城洲洲北附岸洲頭曰郭洲長二里廣一里上有步闡故城方圓稱洲周迴略滿故城洲上城周里闡父騭所築也又東逕陸抗故城今峽州遠安縣在江北有孤山有陸抗故城有丹山時有赤氣意赤溪當出於丹山故市即步騭故城所居

內以圍闡外以禦晉兵

晝夜催切

切迫也

如敵已至衆甚苦之諸將諫曰今宜及

三軍之銳急攻闡比晉救至必可拔也

比必寐翻

何事於圍

以敝士民之力抗曰此城處勢既固

處昌呂翻

糧穀又足且

凡備禦之具皆抗所宿規

抗先嘗督西陵

今反攻之不可猝拔

北兵至而無備表裏受難

難乃旦翻

何以禦之諸將皆欲攻

闡抗欲服衆心聽令一攻果無利圍備始合而羊祜兵

五萬至江陵諸將咸以抗不宜上

自樂鄉而西赴西陵爲上上時掌翻

抗

曰江陵城固兵足無可憂者假令敵得江陵必不能守

所損者小若晉據西陵則南山羣夷皆當擾動其患不

可量也乃自帥衆赴西陵

南山謂江南諸山羣夷所依阻量音良帥讀曰率

初

抗以江陵之北道路平易

易以

敕江陵督張咸作大堰

遏水漸漬平土以絕寇叛

堰於扇翻今江陵有三海八櫃引諸湖及沮漳之水注之

瀾漫數百里即作堰之故智也漸將廉翻

羊祜欲因所遏水以船運糧揚聲

將破堰以通步軍抗聞之使咸亟破之諸將皆惑屢諫

不聽祜至當陽聞堰敗乃改船以車運糧大費功力十

一月楊肇至西陵陸抗令公安督孫遵循南岸拒羊祜

防托南岬使祜軍不得渡而已

水軍督留慮拒徐肩

恐肩順流東下故以水軍拒之抗

自將大軍憑圍對肇

憑長圍以對之則
彼爲客我爲主

將軍朱喬營都

督俞贊亡詣肇

姓譜俞古善
醫俞跗之後

抗曰贊軍中舊吏知吾虛

實吾常慮夷兵素不簡練若敵攻圍必先此處

先悉
薦翻

即

夜易夷兵皆以精兵守之明日肇果攻故夷兵處抗命

擊之矢石雨下肇衆死者相屬

屬之
欲翻

十二月肇計屈夜

遁抗欲追之而慮步闡畜力伺間

間古
覓翻

兵不足分于是

但鳴鼓戒衆若將追者肇衆兇懼悉解甲挺走

兇許拱
翻恐懼

聲挺待鼎翻拔也
挺走拔身而走也

抗使輕兵躡之肇兵大敗

躡
輒翻

祐等

皆引軍還抗遂拔西陵誅闡及同謀將吏數十人皆夷

三族自餘所請赦者數萬口

元非同謀而脅從者請而赦之

東還樂鄉

貌無矜色謙冲如常吳主加抗都護

吳官有左右都護今加都護盡護諸

將也羊祜坐貶平南將軍

征鎮安平四平最下車騎位次驃騎自此而下六等至四征祜

自車騎貶平南凡降十四號

楊肇免爲庶人吳主既克西陵自謂得

天助志益張大使術士尚廣筮取天下

姓譜尚姓師尚父之後後漢有

高士尚子平

對曰吉庚子歲青蓋當入洛陽

其後吳亡皓入洛歲在庚子

吳主喜不修德政專爲兼并之計

賈充與朝士宴飲

朝直遙翻考異曰三十國春秋在十一月河南尹庾
晉春秋在十月己巳恐皆非實故附于冬末

純醉與充爭言充曰父老不歸供養供居用翻卿爲無

天地純曰高貴鄉公何在斥其弒充慙怒上表解職純

亦上表自劾詔免純官仍下五府正其臧否當時除賈充之外居

公位者有五故下五石苞以爲純榮官忘親當除名齊

王攸等以爲純於禮律未有違詔從攸議復以純爲國

子祭酒帝初立國子學定置國子祭酒博士各一人助教十五人以教生徒吳主之游

華里也事見上右丞相萬彧與右大司馬丁奉左將軍

留平密謀曰若至華里不歸社稷事重不得不自還吳

主頗聞之以或等舊臣隱忍不發是歲吳主因會以毒

酒飲或傳酒人私減之又飲留平

飲於鵠翻

平覺之服它藥

以解得不死或自殺

考異曰吳志孫皓傳云或被譴憂死今從江表傳

平憂慙

月餘亦死

慙音悶又音滿

徙或子弟於廬陵初或請選忠清之

士以補近職吳主以大司農樓玄爲宮下鎮主殿中事

吳舊事禁中主者自用親近人皓以或言用玄主殿中事

玄正身帥衆

帥讀曰率

奉法而

行應對切直吳主浸不悅中書令領太子太傅賀邵上

疏諫曰自頃年以來朝列紛錯

朝直
違翻

真偽相質

質音
茂

忠

良排墜信臣被害

被皮
義翻

是以正士推方

推方言
角而爲圓也

而

庸臣苟媚先意承指各希時趣

先悉
薦翻

人執反理之評士

吐詭道之論

詭違也
異也

遂使清流變濁忠臣結舌陛下處

九天之上隱百里之室

管子曰堂上遠於
百里處昌呂翻

言出風靡令

行景從親洽寵媚之臣日聞順意之辭將謂此輩實賢

而天下已平也臣聞興國之君樂聞其過荒亂之主樂

聞其譽

樂音洛譽音
余或音如字

聞其過者過日消而福臻聞其譽

者譽日損而禍至陛下嚴刑法以禁直辭黜善士以逆

諫口杯酒造次死生不保

造七到翻

仕者以退爲幸居者以

出爲福誠非所以保光洪緒熙隆道化也何定本僕隸

小人身無行能

行下孟翻

而陛下愛其佞媚假以威福夫小

人求入必進奸利定間者妄興事役發江邊戍兵以驅

麋鹿老弱飢凍大小怨歎傳曰國之興也視民如赤子

其亡也以民爲草芥

左傳曰陳逢滑曰國之興也視民如傷其亡也以民爲土芥

今

法禁轉苛賦調益繁

調徒鈞翻

中官近臣所在興事而長吏

畏罪苦民求辦是以人力不堪家戶離散呼嗟之聲感

傷和氣今國無一年之儲家無經月之蓄而後宮之中

坐食者萬有餘人又北敵注目伺國盛衰伺相更翻長江之

限不可久恃苟我不能守一葦可杭也詩云誰謂河廣一葦杭之毛氏

曰杭渡也鄭玄曰言一葦加之則可以渡也願陛下豐基彊本割情從道則

成康之治興聖祖之祚隆矣治直吏翻聖祖謂孫權吳主深恨之

於是左右共誣樓玄賀邵相逢駐共耳語大笑駐駐車也謗

訛政事俱被詰責訛山諫翻詰去吉翻送玄付廣州邵原復職既

而復徙玄於交趾竟殺之久之何定姦穢發聞亦伏誅

聞音問

羊祜歸自江陵務修德信以懷吳人每交兵刻

日方戰不爲掩襲之計將帥有欲進謫計者輒飲以醇

酒使不得言

謫古穴翻
飲於鳩翻

祜出軍行吳境刈穀爲糧皆計

所侵送絹償之每會衆江沔遊獵常止晉地若禽獸先

爲吳人所傷而爲晉兵所得者皆送還之于是吳邊人

皆悅服

成伐吳之計者祜也凡其所爲皆慕吳也正以
陸抗對境無間可乘故爲是耳若曰務修德信

則吾不知也

祜與陸抗對境使命常通抗遺祜酒祜飲之不

疑

使疏吏翻
遺于季翻

抗疾求藥於祜祜以成藥與之抗即服之

人多諫抗抗曰豈有酖人羊叔子哉

羊祜字叔子

抗告其邊

戍曰彼專爲德我專爲暴是不戰而自服也各保分界

而已

分扶問翻

無求細利吳主聞二境交和以詰抗抗曰一

邑一鄉不可以無信義況大國乎臣不如此正是彰其

德於祜無傷也吳主用諸將之謀數侵盜晉邊

數所角翻陸

抗上疏曰昔有夏多罪而殷湯用師紂作淫虐而周武

授鉞

湯數夏之罪曰有夏多罪天命殛之武王數紂之罪曰淫酗肆虐穢德彰聞戎商必克上時掌翻

苟無其時雖復大聖亦宜養威自保不可輕動也今不

務力農富國審官任能明黜陟任刑賞訓諸司以德

諸司

謂百執事之人有司存者

撫百姓以仁而聽諸將徇名窮兵黷武動

費萬計士卒彫瘁

瘁秦醉翻

寇不爲衰而我已大病矣今爭

帝王之資而昧十百之利此人臣之姦便非國家之良

策也昔齊魯三戰魯人再克而亡不旋踵何則大小之

執異也

祖張儀說齊湣王之言而畧變其文

况今師所克獲不補所喪乎

吳主不從

喪息浪翻

羊祜不附結中朝權貴

朝直遙翻

荀勗馮統

之徒皆惡之從甥王衍嘗詣祜陳事

統都感翻惡烏路翻從才用翻下同

辭甚清辯祜不然之行拂衣去祜顧謂賓客曰王夷甫

方當以盛名處大位然敗俗傷化必此人也

史言羊祜知人之鑒

懷帝時王衍誤國亡身張本夷衍字也敗補邁翻處昌呂翻

及攻江陵祜以軍法

斬王戎行戎之從弟也故二人皆憾之言論多毀祜時人爲之語曰二王當國羊公無德

資治通鑑卷七十九



總校官庶吉士臣侍朝

校對官檢討臣王坦修

膳錄監生臣潘承煒

欽定四庫全書叢要

史部

資治通鑑卷

八十一

詳校官編修臣汪鏞



欽定四庫全書薈要卷七千六十六

史部

資治通鑑卷八十

宋司馬光撰

胡三省音註

晉紀二

起昭陽大荒落盡屠維大淵獻凡七年

世祖武皇帝上之下

泰始九年春正月辛酉密陵元侯鄭袤卒

考異曰按本傳袤爲司

空固辭久之見許以侯就第拜儀同三司而帝紀云司空鄭袤薨誤也

二月癸巳樂陵

武公石苞卒三月立皇子祗爲東海王吳以陸抗

爲大司馬荊州牧

夏四月戊辰朔日有食之

初鄧

艾之死

事見七十八卷魏元帝咸熙元年

人皆寬之而朝廷無爲之辯

者

爲于偽翻

及帝即位議郎敦煌段灼上疏曰

敦煌徒門翻

鄧艾心

懷至忠而荷反逆之名

荷下可翻

平定巴蜀而受三族之誅

艾性剛急矜功伐善不能協同朋類故莫肯理之臣竊

以爲艾本屯田掌犢人

鄧艾本義陽棘陽人魏太祖破荊州徙汝南爲農民養犢

寵

位已極功名已成七十老公復何所求

復扶又翻

正以劉禪

初降

降戶江翻

遠郡未附矯令承制權安社稷鍾會有悖逆

之心

悖蒲內翻
又蒲沒翻

畏艾威名因其疑似構成其事艾被詔

書即遣彊兵束身就縛不敢顧望

被皮義翻

誠知奉見先帝

必無當死之理也會受誅之後艾官屬將吏愚戇相聚

自共追艾破壞檻車解其囚執

戇直降翻
壞音怪

艾在困地狼

狽失據

狼前則跋其胡退則蹙其尾狼狽屬也生子或欠一足二足相附而後能行離則顛蹶故猝遽

謂之狼狽
狽博蓋翻

未嘗與腹心之人有平素之謀獨受腹背之

誅

腹在前背在後謂前後皆不免於誅

豈不哀哉陛下龍興闡弘大度謂

可聽艾歸葬舊墓還其田宅以平蜀之功繼封其後使

艾闔棺定謚死無所恨

謚神主翻

則天下徇名之士思立功

之臣必投湯火樂爲陛下死矣

樂音洛爲于僞翻

帝善其言而

未能從會帝問給事中樊建以諸葛亮之治蜀

樊建故蜀臣治

直之翻

曰吾獨不得如亮者而臣之乎建稽首曰陛下知

鄧艾之寃而不能直

稽音啓

雖得亮得無如馮唐之言乎

言不能用也馮唐事見十四卷漢文帝十四年

帝笑曰卿言起我意乃以艾孫

朗爲郎中

吳人多言祥瑞者吳主以問侍中韋昭昭

曰此家人筐篋中物耳

言祥瑞而謂之家人筐篋中物者蓋稱引圖緯以言祥瑞之應

故謂其書爲家
人筐篋中物也

昭領左國史

吳有左右國史皆掌記述

吳主欲爲其

父作紀

爲于偽翻

昭曰文皇不登極位當爲傳不當爲紀

吳主

謚其父和曰文皇帝傳直戀翻

吳主不悅漸見責怒昭憂懼自陳衰老

求去侍史二官

侍史侍中及左國史也

不聽時有疾病醫藥監護

持之益急

監工街翻

吳主飲羣臣酒

飲於禁翻

不問能否率以七

升爲限至昭獨以茶代之後更見偏強

強其兩翻

又酒後常

使侍臣嘲弄公卿發摘私短以爲歡

摘當作適

時有愆失輒

見收縛至於誅戮昭以爲外相毀傷內長尤恨

長丁丈翻今知

兩翻使羣臣不睦不為佳事故但難問經義而已

難乃吳

主以為不奉詔命意不忠盡積前後嫌忿遂收昭付獄

昭因獄上辭

辭獄辭也
上時掌翻

獻所著書冀以此求免而吳主

怪其書垢故

垢塵也
故舊也

更被詰責

被皮義翻
詰去吉翻

遂誅昭徙其

家於零陵

五月以何曾領司徒

六月乙未東海王

祗卒

秋七月丁酉朔日有食之

考異曰宋志無
此食今從晉書

詔選公卿以下女備六宮有蔽匿者以不敬論

以律不
敬論罪

也采擇未畢權禁天下嫁娶帝使楊后擇之后惟取潔

白長大而捨其美者帝愛卞氏女欲留之后曰卞氏三

世后族

魏武帝卞后謚曰宣后弟秉生蘭及琳蘭孫女爲高貴鄉公后琳女又爲陳留王后凡三世

不可屈以卑位帝怒乃自擇之中選者以絳紗繫臂

中竹

仲翻公卿之女爲三夫人

孔穎達曰夫扶也言扶侍於王也

九嬪

句斷

二千

石將校女補良人以下

漢制後宮之號十有四等良人視八百石爵比庶長師古曰良

善也將即亮翻校戶教翻

九月吳主悉封其子弟爲十一王王給三

千兵大赦

十一王史逸其名

是歲鄭冲以壽光公罷

吳主愛

姬遣人至市奪民物司市中郎將陳聲素有寵於吳主

繩之以法姬嫔於吳主

嫔與訴同

吳主怒假它事燒鋸斷聲

頭投其身於四望之下

據晉書溫嶠傳嶠討蘇峻於石頭結壘於四望磯又據內史石

頭有四望山蓋山下有磯也斷丁管翻

十年春正月乙未日有食之

閏月癸酉壽光成公鄭

冲卒 丁亥詔曰近世以來多由內寵以登后妃

謂魏三祖

立卞郭毛爲后

亂尊卑之序自今不得以妾媵爲正嫡

媵以證翻

分幽州置平州

幽州言北方太陰幽冥也杜佑曰因幽都山爲名山海經有幽都山今列北荒

統范陽燕北平上谷代遼西漢末公孫度自號平州牧今分昌黎遼東樂浪玄菟帶方五郡置平州

三

月癸亥日有食之 詔又取良家及小將吏女五千人

入宮選之母子號哭於宮中聲聞於外

將即亮翻號戶刀翻聞音問

夏四月己未臨淮康公荀顗卒

謚法溫柔好樂曰康顗魚豈翻

吳

左夫人王氏卒吳主哀念數月不出葬送甚盛時何氏

以太后故宗族驕橫

橫戶孟翻

吳主舅子何都貌類吳主民

間說言吳主已死立者何都會稽又說言章安侯奮

當爲天子奮母仲姬墓在豫章豫章太守張俊爲之掃

除

掃糞掃也除芟除荆棘會古外翻爲于僞翻

臨海太守奚熙

吳主休永安三年分會稽

東部都尉
爲臨海郡

與會稽太守郭誕書

會工
外翻

非議國政誕但白

熙書不白妖言

妖言即前說
言妖於驕翻

吳主怒收誕繫獄誕懼功

曹邵疇曰疇在明府何憂遂詣吏自列白

自列猶
自陳也

疇廁

身本郡位極朝右

郡功曹位居郡朝
之右朝直遙翻

以噂噤之語

噂祖
本翻

噤達合翻
噤聚語也

本非事實疾其醜聲不忍聞見欲含垢藏

疾

左傳曰川澤納汙山
藪藏疾國君含垢

不彰之翰墨鎮躁歸靜使之自

息故誕屈其所是默以見從

謂誕從疇之說默
而不白妖言也

此之爲

愆實由於疇不敢逃死歸罪有司因自殺吳主乃免誕

死送付建安作船

宋白曰吳分侯官之地立建安縣又立曲那都尉主謫徙之人作舟船

遣其舅三郡督何植收奚熙

江表傳作備海督蓋督臨海建安會稽三郡也熙

發兵自守其部曲殺熙送首建業又車裂張俊皆夷三

族并誅章安侯奮及其五子

考異曰江表傳曰張布女有寵於皓而死皓厚葬

之國人見葬太奢麗皆謂皓已死所葬者是也皓舅子何都顏狀似皓故民間訛言都代立臨海太守奚熙信訛言舉兵欲還秣陵誅都都叔父植時爲備海督擊殺熙夷三族訛言乃息又云奮本在章安徙還吳城禁錮使男女不得通婚或年三四十不得嫁娶奮上表乞自比禽獸使男女自相配偶皓大怒遣察戰齎藥賜奮父子皆飲藥死裴松之按建衡二年至奮之死孫皓即位尚未久若奮未被疑之前男女年二十左右至奮死

時不得年三十四也若先已長大自失時未婚娶不由皓之禁錮矣此雖欲增皓之惡然非實理又吳志孫皓傳鳳凰三年會稽妖言奮爲天子遂誅吳熙不言誅奮孫奮傳建衡二年左夫人王氏卒民間訛言遂誅奮及五子三十國晉春秋自皓納張布女至殺奮皆在天冊元年按奮若以建衡二年死不容至鳳凰三年會稽方有訛言不知奮死果在何年今因吳熙之死終言之

秋七月丙寅皇后楊氏

殂初帝以太子不慧恐不堪爲嗣常密以訪后

常當作嘗

后

曰立子以長不以賢

春秋公羊傳之言長知兩翻

豈可動也鎮軍大

將軍胡奮女爲貴嬪

晉制貴人夫人貴嬪是爲三夫人皆金章紫綬嬪毗賓翻

有寵

於帝后疾篤恐帝立貴嬪爲后致太子不安枕帝膝泣

曰

枕職任翻

叔父駿女芷有德色

言有德有色也

願陛下以備六宮

帝流涕許之

以前太常山濤爲吏部尚書濤典選十

餘年

帝受禪濤自吏部郎遷尚書居母喪復奪情起典選選息絹翻

每一官缺輒擇才

資可爲者啓擬數人

才謂其才足以任資謂其資序當爲者

得詔旨有所

向然後顯奏之帝之所用或非舉首衆情不察以濤輕

重任意言之於帝帝益親愛之濤甄拔人物各爲題目

而奏之時稱山公啓事

甄稽延翻明也察也別也

濤薦嵇紹於帝請

以爲秘書郎

晉制秘書監屬官有丞有郎

帝發詔徵之紹以父康得

罪

事見七十八卷魏元帝景元三年

屏居私門欲辭不就

屏必翻

濤謂之

曰爲君思之久矣天地四時猶有消息況於人乎

爲于偽翻

下樹爲人爲同又蠻爲同

紹乃應命帝以爲秘書丞初東關之敗

事見

七十五卷魏邵陵厲公嘉平四年

文帝問僚屬曰近日之事誰任其咎

任音壬

安東司馬王儀修之子也

王修見六十四卷漢獻帝建安八年

對曰

責在元帥

文帝時爲安東將軍監諸軍

文帝怒曰司馬欲委罪孤邪

引出斬之儀子哀痛父非命隱居教授三徵七辟皆不

就

徵詔召也辟公府及州郡辟也哀萍侯翻

未嘗西向而坐

哀居城陽晉朝在洛陽故未嘗

西廬於墓側旦夕攀柏悲號涕淚着樹號戶刀翻樹爲

之枯讀詩至哀哀父母生我劬勞詩蓼莪之辭未嘗不三復

流涕門人爲之廢蓼莪以哀悲慘故廢蓼莪之篇不敢講習三息暫翻復扶又翻蓼力

竹家貧計口而田度身而蠶度徒洛翻人或饋之不受助之

不聽諸生密爲刈麥哀輒棄之遂不仕而終

臣光曰昔舜誅鯀而禹事舜不敢廢至公也嵇康王

儀死皆不以其罪二子不仕晉室可也嵇紹苟無蕩

陰之忠蕩陰事見後八十五卷惠帝永興元年余謂蕩陰之難君子以嵇紹爲忠於所事可也然

未足以塞天性之傷也蕩音湯殆不免於君子之譏乎

吳大司馬陸抗疾病

疾有加而無瘳曰病

上疏曰西陵建平國之

蕃表

蕃籬也表外也謂二郡爲蕃籬於外也

既處上流受敵二境

謂二郡之境西

距巴夔北接魏興上庸二面皆受敵也處昌呂翻

若敵汎舟順流星犇電邁非

可恃援他部以救倒縣也

縣讀曰懸

此乃社稷安危之機非

徒封疆侵陵小害也臣父遜昔在西垂上言西陵國之

西門雖云易守亦復易失

易弋敗翻

若有不守非但失一郡

荊州非吳有也如其有虞當傾國爭之臣前乞屯精兵

三萬而主者循常未肯差赴

主者謂居本兵之職者也差初皆翻

自步聞

以後

步聞反見上卷八年

益更損耗今臣所統千里外禦彊對

對彊

猶言彊敵也

內懷百蠻而上下見兵財有數萬

見賢遍翻財與纔同

羸

敝日久難以待變

羸倫爲翻

臣愚以爲諸王幼冲無用兵馬

以防要務

謂十一王各給三千兵也

又黃門宦官開立占募兵民避

役逋逃入占

占章豐翻

乞特詔簡閱一切料出

料音聊

以補疆

場受敵常處使臣所部足滿八萬省息衆務并力備禦

庶幾無虞

幾居希翻

若其不然深可憂也臣死之後乞以西

方爲屬

陸抗固知吳之將亡特就職分上言之耳屬之欲翻下屬文同

及卒吳主使其

子晏景玄機雲分將其兵

將即亮翻

機雲皆善屬文名重於

世初周魴之子處膂力絕人不修細行鄉里患之

魴符方翻

行下孟翻

處嘗問父老曰今時和歲豐而人不樂何邪父老

歎曰三害不除何樂之有

樂音洛

處曰何謂也父老曰南

山白額虎長橋蛟

南山今湖秀以南諸山也長橋在今常州宜興縣

并子爲三

矣

子謂周處

處曰若所患止此吾能除之乃入山求虎射殺

之因投水搏殺蛟遂從機雲受學篤志讀書砥節礪行

比及暮年州府交辟

射而亦翻行下
孟翻比必寐翻

八月戊申葬元

皇后于峻陽陵帝及羣臣除喪即吉博士陳達議以爲

今時所行漢帝權制太子無有國事自宜終服尚書杜

預以爲古者天子諸侯三年之喪始同齊斬

謂齊衰斬
衰之服其

始自天子達於庶人
無以異也齊津夷翻

既葬除服諒闇以居心喪終制故

周公不言高宗服喪三年而云諒闇此服心喪之文也

周公作無逸曰其在高宗作其即位乃或亮陰三年杜
預遂引此言以爲不服喪之證闇與陰同孔安國曰諒

信也陰
默也

叔向不譏景王除喪而譏其宴樂已早明既葬

應除而違諒闇之節也

左傳晉荀躒如周葬穆后既葬除喪以文伯宴叔向曰王其不

終乎吾聞之所樂必卒焉今王樂憂若卒以憂不可謂終王一歲而有三年之喪二焉於是乎以喪賓宴樂憂

甚矣三年之喪雖貴遂服禮也王雖弗遂宴樂以早亦非禮也樂音洛

子之於禮存諸內

而已禮非王帛之謂

論語孔子曰禮云禮云王帛云乎哉

喪豈衰麻之謂

乎

衰七回翻下同

太子出則撫軍守則監國

左傳晉大夫里克之言監古銜翻

不爲無事宜卒哭除衰麻

卒子恤翻

而以諒闇終三年帝從

之

臣光曰規矩主於方圓然庸工無規矩則方圓不可

得而制也衰麻主於哀戚然庸人無衰麻則哀戚不

可得而勉也素冠之詩正爲是矣

衰倉回翻詩素冠刺不能三年也爲

于偽翻

杜預巧飾經傳以附人情辯則辯矣

傳直戀翻

臣謂

不若陳達之言質略而敦實也

九月癸亥以大將軍陳騫爲太尉

杜預以孟津渡險

請建河橋於富平津

水經注孟津又曰富平津杜佑曰富平津在河陽縣南

議者

以爲殷周所都歷聖賢而不作者必不可立故也

殷都河內

周都洛二代夾河建都不立河橋故以爲言

預固請爲之及橋成帝從百寮

臨會舉觴屬預曰

屬之欲翻

非君此橋不立對曰非陛下之

明臣亦無所施其巧

是歲邵陵厲公曹芳卒初芳之

廢遷金墉也

芳之廢也築宮于河內重門今言遷金墉蓋始廢之時自禁中遷于金墉後乃居于

河內也

太宰中郎陳留范曄素服拜送

晉既受禪避景帝諱採周官名置太

宰以代太師魏因漢制上公惟有太傅據曄傳自太宰從事中郎遷太宰中郎時未置太宰宰當作傳

哀

動左右遂稱疾不出陽狂不言

陽發見於外陰蔽伏於中凡人之作事外爲是

形而內無其實者皆陽爲之外若無所營而內潛經畫皆陰爲之

寢所乘車足不履地

子孫有婚宦大事輒密諮焉合者則色無變不合則眠

寢不安妻子以此知其旨子喬等三人並棄學業絕人

事

按晉書喬年二歲祖馨臨終撫其首曰恨不見汝成人因以所用硯與之至五歲祖母以告喬喬便執硯

涕泣九歲請學在同輩之中言無媒辭李銓常論揚雄才學優於劉向喬以爲向定一代之書正羣籍之篇使雄當之故非所長遂著劉揚優劣論前後辟舉皆不就邑人臘日盜斫其樹人有告者喬陽不聞邑人愧而歸之喬曰卿節日取柴欲與父母相歡娛耳何以愧爲嗚呼觀喬之學行如此則棄學業絕人事殆庶幾乎夷齊

餓于首陽之下之意

侍疾家庭足不出邑里及帝即位詔以二千

石祿養病加賜帛百匹喬以父疾篤辭不敢受祭不言

凡三十六年年八十四終於所寢之車

自邵陵厲公之廢至是方二十

一年史因公卒而究言之

吳比三年大疫

比毗至翻

咸寧元年春正月戊午朔大赦改元

吳掘地得銀尺

上有刻文

吳志曰銀長一尺廣三分刻上有年月字

吳主大赦改元天冊

吳中書令賀邵中風不能言

中竹仲翻

去職數月吳主疑其

詐收付酒藏掠考千數

藏徂浪翻掠音亮

卒無一言乃燒鋸斷

其頭

卒子恤翻斷丁管翻

徙其家屬於臨海又誅樓玄子孫

殺樓玄見

上卷泰始八年

夏六月鮮卑拓拔力微復遣其子沙漠汗入

貢

沙漠汗初入貢見七十八卷魏元帝景元二年汗音寒

將還幽州刺史衛瓘表

請留之又密以金賂其諸部大人離間之

爲力微信諧殺沙漠汗張

本間古
蒐翻

秋七月甲申晦日有食之 冬十二月丁亥

追尊宣帝廟曰高祖景帝曰世宗文帝曰太祖 大疫
洛陽死者以萬數

二年春令狐豐卒弟宏繼立楊欣討斬之

豐自爲敦煌太守見上卷

泰始
八年

帝得疾甚劇及愈羣臣上壽詔曰每念疫氣死

亡者爲之愴然豈以一身之休息忘百姓之艱難邪諸

上禮者皆絕之

爲于偽翻
上時掌翻

初齊王攸有寵於文帝每見

攸輒撫牀呼其小字曰此桃符座也幾爲太子者數矣

事見七十八卷魏元帝咸熙元年幾居依翻數所角翻

臨終爲帝敘漢淮南王魏

陳思王事而泣

漢文帝誅淮南厲王長魏文帝不能容陳思王植引此二事以戒切帝也執

攸手以授帝太后臨終亦流涕謂帝曰桃符性急而汝

爲兄不慈我若不起必恐汝不能相容以是屬汝勿忘

我言及帝疾甚朝野皆屬意於攸

屬之欲翻朝直遙翻

攸妃賈充

之長女也

充先娶李氏豐女也生二女長曰荃爲齊王攸妃長知兩翻

河南尹夏侯

和謂充曰卿二婿親踈等耳

二婿謂攸及太子也

立人當立德充

不答攸素惡荀勗及左衛將軍馮統傾諂勗乃使統說

帝曰

惡烏路翻統都感翻說輸芮翻

陛下前日疾若不愈齊王爲公卿

百姓所歸太子雖欲高讓其得免乎宜遣還藩以安社

稷帝陰納之乃徙和爲光祿勳奪充兵權

充自文帝時領兵

而

位遇無替 吳施但之亂

事見上卷泰始二年

或譖京下督孫楷

於吳主曰楷不時赴討懷兩端吳主數詰讓之徵爲宮

下鎮驃騎將軍

京下督鎮京口宮下鎮在建業楷孫韶之子數所角翻驃匹妙翻騎奇寄翻

楷自疑懼夏六月將妻子來犇拜車騎將軍封丹陽侯

秋七月吳人或言於吳主曰臨平湖自漢末歲塞

臨平湖今

在臨安府仁和縣界有臨平鎮在臨安府城西北四十八里歲荒蕪也音烏廢翻塞悉則翻下同

長老

言此湖塞天下亂此湖開天下平近無故忽更開通此

天下當太平青蓋入洛之祥也

青蓋之占見上卷泰始八年

吳主以

問奉禁都尉歷陽陳訓

吳置奉禁都尉蓋以侍奉宮禁爲稱

對曰臣止能

望氣不能達湖之開塞退而告其友曰青蓋入洛者將

有衝壁之事非吉祥也或獻小石刻皇帝字云得於湖

邊吳主大赦改元天璽

璽氏翻

湘東太守張詠不出筭緡

吳主亮太平二年分長沙東部都尉立湘東郡

吳主就在所斬之狗首諸郡會

稽太守車浚公清有政績

會工外翻車姓出於田千秋車昌遮翻

值郡旱

飢表求振貸吳主以爲收私恩遣使梟首

梟堅堯翻

尚書熊

睦微有所諫

黃帝有熊氏姓譜楚鬻熊之後此以名爲氏者也

吳主以刀環撞

殺之身無完肌

史詳言吳主之昏虐撞直江翻

八月己亥以何曾爲

太傅陳騫爲大司馬賈充爲太尉齊王攸爲司空吳

歷陽山有七穿駢羅穿中黃赤俗謂之石印云石印封

發天下當太平歷陽長上言石印發

據吳志鄱陽上言歷陽山石文理成

字又江表傳曰歷陽縣有石山臨水高百丈其三十丈
所有七穿駢羅今考晉志鄱陽郡無歷陽縣有歷陵縣
陽當作陵今饒州圖經亦載鄱陽歷陵縣有石印山長知兩翻吳主遣使者以太牢祠

之使疏吏翻使者作高梯登其上以朱書石曰楚九州渚吳

九州都揚州士作天子四世治太平始還以聞吳主大

喜封其山神爲王大赦改明年元曰天紀冬十月以

汝陰王駿爲征西大將軍羊祜爲征南大將軍皆開府

辟召儀同三司

此位從公也

祜上疏請伐吳

陸抗沒羊祜始抗疏請伐吳上

時掌

曰先帝西平巴蜀

見七十八卷魏

南和吳會

見七十八

卷魏元帝
咸熙元年

庶幾海內得以休息而吳復背信

事見上卷
泰始元年

幾居希翻
背蒲妹翻

使邊事更興夫期運雖天所授而功業必因

人而成不一大舉掃滅則兵役無時得息也蜀平之時

天下皆謂吳當并亡自是以來十有三年矣

景元四年
蜀亡至是

十三夫謀之雖多決之欲獨凡以險阻得全者謂其執

均力敵耳若輕重不齊強弱異執雖有險阻不可保也

蜀之爲國非不險也皆云一夫荷戟千人莫當

荷下
可翻

及

進兵之日曾無藩籬之限乘勝席卷徑至成都漢中諸

城皆鳥栖而不敢出

謂漢樂諸城也

非無戰心誠力不足以相

抗也及劉禪請降諸營堡索然俱散

索昔各翻

今江淮之險

不如劔閣孫皓之暴過於劉禪吳人之困甚於巴蜀而

大晉兵力盛於往時不於此際平壹四海而更阻兵相

守使天下困於征戍經歷盛衰不可長久也

謂兵將以盛壯之年

出戍經歷營陳至於衰老也

今若引梁益之兵水陸俱下

王濬唐彬統梁益兵

荆楚之衆進臨江陵

荆楚祐所統也

平南豫州直指夏口

胡奮爲平

南將軍王戎爲豫州刺史夏戶雅翻

徐揚青兗並會秣陵

徐揚王渾所統青兗琅邪王伋

所以以一隅之吳當天下之衆執分形散所備皆急巴漢

奇兵出其空虛一處傾壞則上下震蕩雖有智者不能

爲吳謀矣

其後平吳皆如祐所規

吳緣江爲國東西數千里所敵

者大無有寧息孫皓恣情任意與下多忌將疑於朝

即將

亮翻朝直遙翻

士困於野無有保世之計一定之心平常之日

猶懷去就兵臨之際必有應者終不能齊力致死已可

知也其俗急速不能持久弓弩戟楯不如中國唯有水

戰是其所便一入其境則長江非復所保還趣城池

趣七

喻翻去長入短非吾敵也官軍縣進縣讀曰懸人有致死之志

吳人內顧各有離散之心如此軍不踰時克可必矣帝

深納之而朝議方以秦涼爲憂謂樹機能未平也朝直遙翻祜復表

曰復扶又翻吳平則胡自定但當速濟大功耳議者多有不

同賈充荀勗馮統尤以伐吳爲不可祜歎曰天下不如

意事十常居七八天與不取豈非更事者恨於後時哉

言吳可取而不取機會一失經見其事者豈不有後時之恨更工衡翻唯度支尚書杜預

魏制度支尚書度徒洛翻中書令張華與帝意合贊成其計丁卯

立皇后楊氏大赦后元皇后之從妹也

從才

用翻美而有婦

德帝初聘后后叔父璠

璠余招翻

上表曰自古一門二后未

有能全其宗者乞藏此表於宗廟異日如臣之言得以

免禍帝許之

璠雖有此表終不能以免禍

十二月以后父鎮軍將軍

駿爲車騎將軍封臨晉侯

國號晉而封后父爲臨晉侯不祥之徵也

尚書褚

碧郭奕皆表駿小器不可任社稷之重

碧離灼翻仕音士

帝不

從駿驕傲自得胡奮謂駿曰卿恃女更益豪邪歷觀前

世與天家婚未有不滅門者但早晚事耳駿曰卿女不

在天家乎

天子尊無二上故曰天家言其尊如天也

奮曰我女與卿女作婢

耳何能爲損益乎

三年春正月丙子朔日有食之立皇子裕爲始平王

庚寅裕卒三月平虜護軍文鴛督涼秦雍州諸軍討

樹機能破之諸胡二十萬口來降

雍於用翻降戶江翻

夏五月

吳將邵顗

顗魚豈翻紀作邵凱

今從羊祐傳

夏祥帥衆七千餘人

來降

夏戶雅翻帥讀曰率降戶江翻

秋七月中山王睦坐招誘逋亡

貶爲丹水縣侯

誘音酉

有星孛于紫宮

李蒲內翻

衛將軍

楊珣等建議以爲古者封建諸侯所以藩衛王室今諸

王公皆在京師非干城之義又異姓諸將居邊宜參以

親戚

考異曰職官志以爲珣與荀勗以齊王攸有時望懼太子有後難故建此議使諸王之國帝初未

之察於是下詔議其制按勗傳有異議又時齊王不之國疑此說非實今不取帝乃詔諸王各

以戶邑多少爲三等大國置三軍五千人次國二軍三

千人小國一軍一千一百人

時以平原汝南琅邪扶風齊爲大國梁趙樂安燕安

平義陽爲次國餘國爲小國

諸王爲都督者各徙其國使相近八月

癸亥徙扶風王亮爲汝南王出爲鎮南大將軍都督豫

州諸軍事琅邪王倫爲趙王督鄴城守事勃海王輔爲

太原王監并州諸軍事以東莞王佺在徐州徙封琅邪

王莞音官
佺音曹汝陰王駿在關中徙封扶風王又徙太原王

顥爲河間王汝南王東爲南陽王輔孚之子顥孚之孫

也顥魚
容翻其無官者皆遣就國諸王公戀京師皆涕泣而

去又封皇子瑋爲始平王允爲濮陽王該爲新都王遐

爲清河王其異姓之臣有大功者皆封郡公郡侯封賈

充爲魯郡公追封王沈爲博陵郡公

沈持
林翻

徙封鉅平侯

羊祜爲南城郡侯

時詔以泰山之南武陽牟南城梁父平陽五縣爲南城郡羊祜本泰山南

城人也帝制公侯邑萬戶以上爲大國五千戶以上爲次國不滿五千戶爲小國

祜固辭不受

祜每拜官爵常多避讓至心素著故特見申於分列之

外見申謂許之辭爵其志獲申也分列謂分封列爵也

祜歷事二世

謂事文帝及帝也

職

典樞要凡謀議損益皆焚其草世莫得聞所進達之人

皆不知所由

謂人由祜薦引而進達不知其所由來也

常曰拜官公朝謝恩

私門吾所不敢也

朝直遙翻

兗豫徐青荆益梁七州大水

冬十二月吳夏口督孫慎入江夏汝南

江夏郡屬荊州汝南郡屬

豫州相去甚遠沈約宋志江夏太守治汝南縣本沙羨地晉末汝南郡民流寓夏口因立爲汝南則此時江夏

郡未有汝南縣也無亦史追書乎夏戶雅翻略千餘家而去詔遣侍臣詰羊

祜不追討之意詰去吉翻并欲移荊州祜曰江夏去襄陽八

百里比知賊問比必寐翻賊已去經日步軍安能追之勞師

以免責非臣志也昔魏武帝置都督類皆與州相近揚如

州刺史治壽春都督揚州諸軍以兵執好合惡離故也

好呼到翻疆場之間一彼一此慎守而已左傳魯桓公曰疆場之間

慎守其一而備其不虞若輒徙州賊出無常亦未知州之所宜據

也 是歲大司馬陳騫自揚州入朝朝直以高平公罷

吳主以會稽張儼多所譖白

會工外翻 儼昌六翻

甚見寵任累

遷司直中郎將封侯其父爲山陰縣倅

山陰縣屬 會稽郡

知倅

不良上表曰若用倅爲司直有罪乞不從坐吳主許之

倅表置彈曲二十人專糾司不灋

彈徒干翻

於是吏民各以

愛憎互相告訐獄犴盈溢

訐居謁翻 犴音岸 犴野犬也 野犬所以守故爲獄又胡地

謂犬爲犴

上下囂然倅大爲奸利驕奢暴橫

橫戶孟翻

事發父子

皆車裂 衛瓘遣拓跋沙漠汗歸國

前年瓘表留沙漠汗 讒間既行乃遣

歸

自沙漠汗入質

入質見七十七卷魏元帝景元二年質音致

力微可汗諸

子在側者多有寵及沙漠汗歸諸部大人共譖而殺之

既而力微疾篤烏桓主庫賢親近用事受衛瓘賂欲擾

動諸部乃礪斧於庭謂諸大人曰可汗恨汝曹讒殺太

子

此時鮮卑君長已有可汗之稱可令讀從刊入聲汗音寒

欲盡收汝曹長子殺之

長

知翻

諸大人懼皆散走力微以憂卒時年一百四子悉

祿立

悉祿魏收魏書作悉鹿

其國遂衰初幽并二州皆與鮮卑接

東有務桓西有力微多爲邊患衛瓘密以計間之

間古覓翻

務桓降而力微死

考異曰魏收後魏書鐵弗劉虎匈奴去卑之孫昭成四年死子務桓立

按昭成四年晉成帝咸康七年也務桓不應與瓘同時蓋二人皆名務桓耳

朝廷嘉瓘功封

其弟爲亭侯

四年春正月庚午朔日有食之

司馬督東平馬隆

晉制

二衛前驅由基彊弩爲三部司馬各置督沈約曰殿中司馬督晉武帝時殿中宿衛號曰三部司馬與殿中將軍分隸左

上言涼州刺史楊欣失羌戎之和必敗

隆言欣必

敗猶漢皇甫規之言馬賢蓋懷才欲用故以此自顯耳

夏六月欣與樹機能之

黨若羅拔能等戰于武威敗死

弘訓皇后羊氏殂

景皇

后居弘訓宮

羊祜以病求入朝

朝直遙翻

既至帝命乘輦入殿

不拜而坐祜面陳伐吳之計帝善之以祜病不宜數入

數所角翻

更遣張華就問籌策祜曰孫皓暴虐已甚於今可

不戰而克若皓不幸而沒吳人更立令主雖有百萬之

衆長江未可窺也將爲後患矣華深然之祜曰成吾志

者子也帝欲使祜卧護諸將祜曰取吳不必臣行但既

平之後當勞聖慮耳功名之際臣不敢居若事了當有

所付授願審擇其人也

以東南壤界闊遠當得人以鎮撫之

秋七月己

丑葬景獻皇后于峻平陵

即弘訓后也

司冀充豫荆揚州

大水

司州即漢司隸校尉所部也漢司隸部察郡縣與州刺史同晉遂定名司州統河南滎陽弘農上洛

平陽河東汲郡河內廣平陽平魏郡頓丘冀州者亂則冀安弱則冀強荒則冀豐統趙國鉅鹿安平平原樂陵勃海河間高陽博陵清河中山常山等郡國

螟傷稼

螟食苗心之蟲

詔問主者何以

佐百姓

主者謂左民及度支二曹也

度支尚書杜預上疏

度徒洛翻上時掌翻

以爲今者水災東南尤劇宜敕充豫等諸州留漢氏舊

陂繕以蓄水餘皆決瀝令飢者盡得魚菜螺蚌之饒

螺盧

戈翻蚌步項翻此目下日給之益也水去之後滇淤之田

淤依據翻

畝收數鍾此又明年之益也典牧種牛有四萬五千餘

頭

晉志典牧令屬太僕種章勇翻

不供耕駕至有老不穿鼻者可分以

給民使及春耕種穀登之後責其租稅此又數年以後

之益也帝從之民賴其利

考異曰食貨志云咸寧三年杜預傳云四年按五行志

三年大水無蟲災

四年螟今從預傳預在尚書七年

泰始六年預自秦州刺史得罪歸拜度支

尚書至是

損益庶政不可勝數

勝音升

時人謂之杜武庫

七年矣

言其無所不有也 九月以何曾爲太宰辛巳以侍中

尚書令李充爲司徒 吳主忌勝已者侍中中書令張

尚絃之孫也

張絃事孫策孫權見漢獻帝紀

爲人辯捷談論每出其表

吳主積以致恨後問孤飲酒可以方誰

方比方也

尚曰陛下

有百觚之量吳主曰尚知孔丘不王而以孤方之

孔叢子曰

趙平原君與孔子高飲強子高酒曰諺云堯飲千鍾孔子百觚子路嗑嗑尚飲十榼古之聖賢無不能飲子何辭焉觚飲器也受二升王干况翻因發怒收尚公卿已下百餘人詣宮

叩頭請尚罪得減死送建安作船尋就殺之

考異曰三十國春

秋云岑昏等泥頭請代尚死尚得免死徙廣州今從尚傳參取環氏吳紀余觀尚之爲人蓋以辯給得親近於孫皓而亦以辯給取怒請其死者必岑昏之徒三十國春秋所書蓋得其實

冬十月徵征

北大將軍衛瓘爲尚書令是時朝野咸知太子昏愚不

堪爲嗣瓘每欲陳啓而未敢發會侍宴陵雲臺

陵雲臺
魏文帝

所築瓘陽醉跪帝牀前曰臣欲有所啓帝曰公所言何邪

瓘欲言而止者三因以手撫牀曰此座可惜帝意悟固

謬曰公真大醉邪瓘於此不復有言帝悉召東宮官屬

爲設宴會

復扶又翻爲于
偽翻下便爲同

而密封尚書疑事令太子決

之賈妃大懼倩外人代對

倩七正翻假
手於人也

多引古義給使

張泓曰太子不學陛下所知而答詔多引古義必責作

草主

言將責問作對
草之主名也

更益譴負不如直以意對妃大喜

謂泓曰便爲我好答富貴與汝共之

給使給東宮使令
張泓蓋庸中之俊

俊者後爲趙王倫拒齊王
罔於陽翟者必是人也

泓即具草令太子自寫帝省

之甚悅

省悉
景翻

先以示瓘瓘大踧踖

踧子六翻踖子昔
翻踧踖不自安貌

衆

人乃知瓘嘗有言也賈充密遣人語妃云衛瓘老奴幾

破汝家

爲賈妃怨衛瓘張本語牛倨翻
國春秋在泰始八年按瓘傳泰始初爲青州刺

史徙幽州八年不得在京師瓘傳在遷司空後按帝紀
太康三年賈充卒十二月瓘爲司空故移在入爲尚書

史徙幽州八年不得在京師瓘傳在遷司空後按帝紀

吳人大佃皖城

佃亭年翻治田
也皖戶板翻

欲謀入寇都督揚

州諸軍事王渾遣揚州刺史應綽攻破之斬首五千級

焚其積穀百八十餘萬斛踐稻田四千餘頃毀船六百

餘艘

艘蘇刀翻

十一月辛巳太醫司馬程據獻雉頭裘

晉志

太醫屬宗正雉頭毛采炫耀集以爲裘

帝焚之於殿前甲申敕内外敢有

獻奇技異服者罪之

記王制作淫聲異服奇技奇器以疑衆殺技渠綺翻

羊祜

疾篤舉杜預自代辛卯以預爲鎮南大將軍都督荊州

諸軍事祜卒

卒子恤翻下同

帝哭之甚哀是日大寒涕淚霑須

鬢皆爲冰祜遺令不得以南城侯印入樞

樞音舊

帝曰祜

固讓歷年身沒讓存

謂身沒而遺令讓侯印也

今聽復本封以彰高

美

祐本封鉅平侯

南州民間祐卒爲之罷市巷哭聲相接

謂南州荆

州也爲于

吳守邊將士亦爲之泣祐好遊峴山

好呼到翻峴戶

典翻襄陽人建碑立廟於其地歲時祭祀望其碑者無不

流涕因謂之墮淚碑杜預至鎮簡精銳襲吳西陵督張

政大破之政吳之名將也恥以無備取敗不以實告吳

主預欲間之

間古覓翻

乃表還其所獲吳王果召政還遣武

昌監留憲代之

吳之邊鎮有督有監督者督諸軍事之職監者監諸軍事之職

十二

月丁未朗陵公何曾卒曾厚自奉養過於人主司隸校

尉東萊劉毅數劾奏曾侈汰無度

數所角翻

帝以其重臣不

問及卒博士新興秦秀議曰

秀新興雲中人朗之子也

曾驕奢過度

名被九域

九域九州之域被皮義翻

宰相大臣人之表儀若生極其

情死又無貶王公貴人復何畏哉謹按謚灋

謚法始於周公以行

爲謚復扶又翻

名與實爽曰繆怙亂肆行曰醜宜謚醜繆公帝

策謚曰孝

策謚者不用博士議以詔策賜謚

前司隸校尉傳玄卒

異曰考

玄傳曰五年遷太僕轉司隸景獻皇后崩坐爭位罵尚書免尋卒按景獻后崩在四年玄傳誤也

玄性

峻急每有奏劾或值日暮捧白簡整簪帶

文選任昉彈曹景宗曰謹

奉白簡以聞呂向注云簡略狀也晉志曰古者執笏有事則書之故常簪筆今之白筆是其遺意三臺五省二

品文官簪之帶革帶也古之

竦踊不寐坐而待旦由是

貴游震懾

周官師氏凡國之貴游子弟學焉注云貴游子弟王公之子弟游無官司者懾之涉翻

臺閣生風玄與尚書左丞博陵崔洪善

漢安帝分安平置博陵國

洪

亦清厲骨鯁好面折人過

好呼到翻折之舌翻

而退無後言人以

是重之鮮卑樹機能久爲邊患

泰始六年樹機能爲寇至是九年矣

僕

射李憲請發兵討之朝議皆以爲出兵重事虜不足憂

朝直遙
翻下同

五年春正月樹機能攻陷涼州

涼州治武威

帝甚悔之臨朝

而歎曰誰能爲我討此虜者

爲于偽翻

司馬督馬隆進曰陛

下能任臣臣能平之帝曰必能平賊何爲不任顧方略

何如耳隆曰臣願募勇士三千人無問所從來

應募者或出於

農畝或出於營伍或出於逋逃或出於奴隸皆不問其所從來也

帥之以西虜不足平

也

帥讀曰率

帝許之乙丑以隆爲討虜護軍武威太守公卿

皆曰見兵已多不宜橫設賞募

見賢遍翻橫戶孟翻

隆小將妄言

將即亮翻

不足信也帝不聽隆募能引弓四鈞挽弩九石者

取之

三十斤爲鈞四鈞爲石石百二十斤

立標簡試

標表也

自旦至日中得

三千五百人隆曰足矣又請自至武庫選仗武庫令與

隆忿爭

晉志武庫令屬衛尉

御史中丞劾奏隆

自東漢至魏晉以中丞爲御史臺主

劾戶槩翻又戶得翻

隆曰臣當畢命戰場武庫令乃給以魏時朽

仗非陛下所以使臣之意也帝命惟隆所取仍給三年

軍資而遣之初南單于呼厨泉以兄於扶羅子豹爲

左賢王及魏武帝分匈奴爲五部

五部見上卷泰始六年

以豹爲

左部帥

帥所類翻

豹子淵幼而雋異師事上黨崔游博習經

史嘗謂同門生上黨朱紀雁門范隆曰吾常恥隨陸無

武絳灌無文隨陸遇高帝而不能建封侯之業絳灌遇

文帝而不能興庠序之教豈不惜哉

隨陸隨何陸賈絳灌絳侯周勃灌將

軍於是兼學武事及長

長知兩翻

猿臂善射膂力過人姿貌

魁偉爲任子在洛陽王渾及子濟皆重之屢薦於帝帝

召與語悅之濟曰淵有文武長才陛下任以東南之事

吳不足平也孔恂楊珧曰非我族類其心必異

左傳魯季文子

曰史佚之志有之非我族類其心必異

珣余招翻

淵才器誠少比然不可重任

也

少詩
治翻

及涼州覆沒帝問將於李熹對曰陛下誠能發

匈奴五部之衆假劉淵一將軍之號使將之而西樹機

能之首可指日而梟也

使將即亮翻
梟堅堯翻

孔恂曰淵果梟樹

機能則涼州之患方更深耳帝乃止東萊王彌家世二

千石

世語曰彌魏玄菟
太守王頎之孫

彌有學術勇略善騎射青州人

謂之飛豹處士陳留董養見而謂之曰君好亂樂禍若

天下有事不作士大夫矣

言將爲賊也處昌呂
翻好呼到翻樂音洛

淵與彌

友善謂彌曰王李以鄉曲見知

王渾太原人李憲上黨人與渚同州里

每

相稱薦適足爲吾患耳因歔歔流涕

歔音虛歔音希又吁既翻

齊王

攸聞之言於帝曰陛下不除劉淵臣恐并州不得久安

王渾曰大晉方以信懷殊俗奈何以無形之疑殺人侍

子乎何德度之不弘也帝曰渾言是也會豹卒以淵代

爲左部帥

劉淵事始此史言晉將有亂帥所類翻

夏四月大赦

除部

曲督以下質任

帝受禪之初除部曲將質任今又除部曲督質任質音致

吳桂林

太守修允卒

桂林漢縣屬鬱林郡吳主皓鳳凰三年分立桂林郡

其部曲應分給

諸將督將郭馬何典王族等累世舊軍不樂離別會

吳主料實廣州戶口

將即亮翻樂音洛料音聊

馬等因民心不安

聚衆攻殺廣州督虞授馬自號都督交廣二州諸軍事

使典攻蒼梧族攻始興

吳主皓甘露元年分桂陽南部都尉立始興郡

秋八月

吳以軍師張悌爲丞相牛渚都督何植爲司徒執金吾
滕修爲司空未拜更以修爲廣州牧帥萬人從東道討

郭馬

帥讀曰率

馬殺南海太守劉略逐廣州刺史徐旗吳主

又遣徐陵督陶濬將七千人

徐陵與洞浦對岸吳主權時呂範洞浦之敗魏臧霸

度江攻徐陵全琮徐盛擊却之又華覈封徐陵亭侯則徐陵莖亭名吳以其臨江津置督守之南徐州記曰京口先爲徐陵其地莖丹徒縣之西鄉京口里也從西道與交州牧陶璜共擊馬

吳有鬼目菜生工人黃耆家有買菜生工人吳平家

吳志曰鬼目菜依綠葉樹長丈餘莖廣四寸厚三分買菜高四尺厚二分如枇杷形莖廣尺八寸下莖廣五寸兩邊生葉綠色東觀案圖書吳有東觀令名鬼目曰芝草買菜

曰平慮草吳主以耆爲侍芝郎平爲平慮郎皆銀印青

綬以漢制言之銀印青綬中二千石服之

吳主每宴羣臣咸令沈醉

沈持林翻

又置黃門郎十人爲司過宴罷之後各奏其闕失迂視

謬言罔有不舉

沈持林翻迂五故翻逆也

大者即加刑戮小者記錄

爲罪或剝人面或鑿人眼由是上下離心莫爲盡力

爲于

偽翻益州刺史王濬上疏曰孫皓荒淫凶逆宜速征伐若

一旦皓死更立賢主則彊敵也

更工衡翻

臣作船七年

泰始八年

濬始作船至是蓋七期年矣

日有朽敗臣年七十死亡無日三者一

乖則難圖也誠願陛下無失事機帝於是決意伐吳會

安東將軍王渾表孫皓欲北上

上時掌翻

邊戍皆戒嚴朝廷

乃更議明年出師王濬參軍何攀奉使在洛上疏稱皓

必不敢出宜因戒嚴掩取甚易

易以鼓翻

杜預上表曰自閏

月以來

是年閏七月

賊但敕嚴下無兵上

吳自建業寇淮襄皆自下泝江而上

上時掌翻

以理執推之賊之窮計力不兩完必保夏口以東

以延視息

凡人目不能視氣不能息則赫然死人矣

無緣多兵西上空其國

都而陛下過聽便用委棄大計縱敵患生誠可惜也嚮

使舉而有敗勿舉可也今事爲之制務從完牢若或有

成則開太平之基不成不過費損日月之間何惜而不

一試之若當須後年

須待也

天時人事不得如常臣恐其

更難也今有萬安之舉無傾敗之慮臣心實了

了決也

不

敢以曖昧之見自取後累

曖昧不明也累力瑞翻

惟陛下察之旬

月未報預復上表曰

復扶又翻

羊祜不先博謀於朝臣

朝直遙翻

而密與陛下共施此計故益令朝臣多異同之議凡事

當以利害相校今此舉之利十有八九而其害一二止

於無功耳必使朝臣言破敗之形亦不可得直是計不

出已功不在身各恥其前言之失而固守之也

此言指出賈充

荀勗馮統等肺腑

自頃朝廷事無大小異意鋒起雖人心不同

亦由恃恩不慮後患故輕相異同也自秋已來討賊之

形頗露今若中止孫皓或怖而生計

怖普布翻

徙都武昌更

完修江南諸城遠其居民城不可攻野無所掠則明年

之計或無所及矣帝方與張華圍碁

博物志曰堯造圍碁以教子丹朱或

曰舜以子商均愚故作圍碁以教之其法非智莫能也

預表適至華推枰斂手曰

推吐雷翻枰音平碁局也

陛下聖武國富兵彊吳主淫虐誅殺賢能

當今討之可不勞而定願勿以爲疑帝乃許之以華爲

度支尚書量計運漕

度徒洛翻量音良

賈充荀勗馮統固爭之

統吐
感翻

帝大怒充免冠謝罪僕射山濤退而告人曰自非

聖人外寧必有內憂

左傳晉大夫
范文子之言

今釋吳爲外懼豈非

笑乎

山濤身爲大臣不昌言於朝而
退以告人蓋求合於賈充者也

冬十一月大舉伐

吳遣鎮軍將軍琅邪王伷出涂中

伷音胄吳主權作堂
邑涂塘即其地蓋從

今滁州取真州
路涂讀曰滁

安東將軍王渾出江西

今和州出
橫江渡路建威

將軍王戎出武昌平南將軍胡奮出夏口鎮南大將軍

杜預出江陵龍驤將軍王濬已東監軍魯國唐彬下巴

蜀

監古
銜翻

東西凡二十餘萬命賈充爲使持節假黃鉞大

都督

魏文帝以曹真都督中外諸軍事假黃鉞明帝太和四年司馬懿征蜀加號大都督此仍魏制也武

王伐紂左杖黃鉞黃鉞天子之器非人臣所得專用故曰假使疏吏翻

以冠軍將軍楊濟

副之

冠古玩翻

充固陳伐吳不利且自言衰老不堪元帥之

任

帥讀從所類翻

詔曰君若不行吾便自出充不得已乃受節

鉞將中軍南屯襄陽爲諸軍節度

馬隆西度溫水

武威

之東有溫水

樹機能等以衆數萬據險拒之隆以山路陘隘

乃作扁箱車

陘與狹同車箱扁則可行狹路扁補典翻

爲木屋施於車上

木屋

所以蔽風雨捍矢石轉戰而前行千餘里殺傷甚衆

考異曰隆傳曰或夾道

累磁石賊被鐵鎧行不得前隆卒悉被犀甲無所留礙
賊以爲神按此說太誕恐不可信 余謂磁石脅鐵鎧

誠有此理

自隆之西音問斷絕朝廷憂之或謂已沒後隆使

夜到

使疏吏翻

帝撫掌歡笑詰朝召羣臣謂曰若從諸卿言

無涼州矣

詰去吉翻朝如字

乃詔假隆節拜宣威將軍

沈約志魏置將

軍四十號
宣威第二

隆至武威鮮卑大人猝跋韓且萬能帥萬餘

落來降

且子閭翻帥讀曰率降戶江翻

十二月隆與樹機能大戰斬之

涼州遂平

詔問朝臣以政之損益司徒左長史傅咸

上書

晉志司徒加置左右長史各一人朝直遙翻

以爲公私不足由設官太

多舊都督有四今并監軍乃盈於十

魏初置都督諸軍東南以備吳西以

備蜀北以備胡隨其資望輕重而加以征鎮安平之號

有四而已其後增置有都督鄴城守諸軍都督秦雍涼

諸軍都督梁益諸軍都督荊州諸軍都督揚州諸軍都

督徐州諸軍都督淮北諸軍都督豫州諸軍都督幽州

諸軍都督并州諸軍凡

禹分九州今之刺史幾向一倍

十其資輕者爲監軍

時有司豫徐兗荆揚梁益寧交秦雍

戶口比漢十分之

涼冀幽并青十八州刺史幾居希翻

一漢元始之初民戶千三百二十三萬三千六百一十

二口五千九百一十九萬四千九百七十八漢之極

盛也桓帝之初戶二千六百七萬九百六十五千六萬

六千八百五十六魏既并蜀景元四年與蜀通計民戶

九十四萬三千四百二十三口五百三十七萬二千八

百九十一益口猶及漢十分之一而戶則未幾及也

而置郡縣更多虛立軍府動有百數而無益宿衛五等

諸侯坐置官屬

軍府謂驃騎車騎衛伏波撫軍都護鎮軍中軍典軍上軍撫國領軍護軍左右

衛驍騎游擊左右前後軍及雜號將軍也五等諸侯官屬王置傳友文學郎中令中尉大農左右常侍侍郎典書典祠典衛學官等令典書丞治書中尉司馬世子庶子陵廟牧長謁者中大夫舍人典府公侯以下置官屬隨國小大無定制諸所廩給皆出百姓此其所以困乏者也當

今之急在於并官息役上下務農而已咸玄之子也時又議省州郡縣半吏以赴農功中書監荀勗以爲省吏不如省官省官不如省事省事不如清心昔蕭曹相漢

載其清靜民以寧一

事見十三卷
漢惠帝二年

所謂清心也抑浮說

簡文案略細苛宥小失有好變常以徼利者必行其誅

所謂省事也

好呼倒翻
徼一逞翻

以九寺併尚書蘭臺付三府所

謂省官也

九寺謂九卿寺也漢初九卿各有所掌東都
以後尚書諸曹分掌衆軍九卿殆爲具官故

欲併之尚書蘭臺御史臺也三府三公府也漢丞相有
長史司直御史大夫有中丞侍御史掌察舉非法故勗

欲以蘭臺
付之三府

若直作大例凡天下之吏皆減其半恐文武

衆官郡國職業劇易不同

易以
豉翻

不可以一槩施之若有

曠闕皆須更復或激而滋繁亦不可不重也

資治通鑑卷八十